

ASO TOFI, 19 FEPUARI 2015

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: I le agaga faaaloalo ou te ofo alofa atu ai ma faatalofa atu i le paia maualuga o le tatou Maota i lenei taeao fou. O le viiga i mea aupito aluga ma le faamanu i Lona Suafa, e ao ona tatou muai tapa tulia i le tata i lenei taeao, tatou te sulaina Lona alofa ma Lona agalelei aua le leoleoina o o tatou loto ma finagalo ae tatou te le i alo atu i a tatou galuega i lenei aso. E momoli atu le faamalo ma le faafetai i le onosai o le paia ma le mamalu o le Maota Fono i sui usufono mamalu uma o le Maota nei i tulaga masani, i mamalu ma paia sauoo o lau Afioga i le Palemia ma lau Kapeneta mamalu, aemaise foi lea Itu o le Maota i lau Afioga i le Taitai o le Itu Agai ma le paia maualuga o lo tatou Maota nei.

E ofo alofa atu i tulaga aloaia; afifio maia, maliu mai ma tala mai aao i lenei aso. E faatalofa atu foi i le paia ma le mamalu o Samoa ua tatou faatasi aemaise le paia i le Ofisa o le Fono ma lau Afioga i le Failautusi.

E malolo le Fono i le aso ananafi o lo o tulei saunoa lau Afioga i le Taitai o le Malo e ala i le Saunoaga Faaminisita i le faamalamalamaina pea o le pitolaau a le Malo, e ala i lenei Tulafono Tau Faaofi taua o lo o faatulai mai i luma o le Laulau a Fono i le Fonotaga lenei.

A o le i tuuina atu le avanoa i lau Afioga i le Palemia, e tatalo atu pea i lo tatou Maota ina ia tatou maua pea le lavapapale ma usi le faafogafoga i taimi uma, e faapena foi le taimi e tuuina atu ai ma avatu le avanoa i sui usufono mamalu e saunoa, ia saunoa tonu i tulaga i le Tulafono Tau Faaofi ma tulai atu foi le Malo e faapupula nisi o tulaga e tataua ona faamalamalama.

Tulai mai lau Afioga i le Palemia.

SAUNOAGA FAAMINISITA A LE AFIGOGA I LE PALEMIA

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai, tatou te auai faatasi i le taulaga na e molia e faafetaia ai le alofa o le Atua ona ua maleifua mai ma alafai mai i faguga lelei le paia maualuga o le Maota nei i lau Afioga i le Fofoga Fetalai, ae faapea foi le Afioga i le Taitai o le Itu Agai, le Sui Taitai, le Taitai lona 3, 4, 5, 6 se i tau i le 11, e faapena foi le matou Vaega toatele. Ua tatou feiloai i lenei taeao fou i le alofa matalasi o lo tatou Matai. E le o toe umi foi si au aniani Saina lea e tau faasolosolo atu. O le agaga lava ina ia malamalama atili le Tulafono Tau Faaofi a le Afioga i le Sui Palemia ona o se Tulafono Tau Faaofi taua tele mo le lumanai o a tatou fanau.

Lau Afioga i le Fofoga Fetalai ma le mamalu o sui usufono o le Fono Aoao Faitulafono. O manatu o lo o taumafai le Malo e molimoli atu, e leai lava se fuafuaga o lo o taumafai i ai le Malo e faatino e i ai se agaga e leaga ai lo tatou atunuu. Na o le agai lava i luma le mea o lo o taumafai nei i ai, aemaise lava o se Tulafono Tau Faaofi pe a matau i saunoaga manino ma saunoaga malamalama a le Sui Palemia i le tele o tausaga o galulue i ai lana Matagaluega ma le Komiti. Na matua leai lava se tulimanu e le i oo i ai i le saili i fafo i atunuu, aemaise o atunuu e pei foi o Samoa i le tulaga i le tele o laueleele ma le toaitiiti o tagata i le Carribbean ma isi foi atunuu.

E le o se Tulafono Tau Faaofi la lau Afioga i le Fofoga Fetalai na faapaole ona fai. Ua tele foi ina malamalama le tulaga o tapenaga lea ua ta'ui i totonu o le Tulafono Tau Faaofi ina ia malu puipua ai itu ia o lo o aliali mai o lo o i ai ni atugaluga i le mamalu o le Maota. E le faapea o tali'a'aina finagalo o lo o aumai. Aua o finagalo lava ia o lo o aumai, o finagalo foi na o lea sa maualuga i le Komiti faapea foi le Minisita, o manatu foi na sa lagalaga i le taimi na talanoa ai le Tulafono Tau Faaofi lenei i totonu o le Kapeneta, ma e umi lava se taimi o faatalanoa le Tulafono Tau Faaofi lenei. E le faapea la sa i ai se agaga foi lea e faapea ua laaloa le vaai i itu ia sa lagalaga uma lava e sui usufono i le aso ananafi.

E momoli atu lau faamalo ia te outou ua uma ona sausaunoa. O lea foi ou te vaai atu ua taufai luelue uma outou ulu outou e le i sausaunoa. O lea e genogeno mai e faapea, "Ua lava ia lena o lea o le a pasi le Tulafono Tau Faaofi." O mea lava e faapea e avatu aumai, ae matua lava i le oō.

Lau Afioga i le Fofoga Fetalai, o le ala lea e alu alu ai lava a matou upu ma toe foi i tua, e toe agai i tua upu ma faamatalaga leaga o le isi lea gasegase e gasegase ai tatou uma. E galo gofie ia i tatou mea na o tatou fai ma le auala na tatou omai ai. Fai mai le mau a le isi Historian, i latou ia e i ai le tomai e teuina talatuu ma tala faasolopito o le lalolagi, "A e fia malamalama i le lumanai, toe tepa tasi lava i le history po o le talatuu ona e tele mea e aoga mo le lumanai." O se lapataiga mo le lumanai, ia fai ma toe tepa i tua ona o mea na tutupu e ono toe tutupu foi pe a tatou faatamala." Tatou te le toe fia malaga i Savaii i ni vaa karasini. O vaa foi ia e tailima, taiono itula o taumalua, e taunuu ua tatou manogi tiso uma ai ma taufai mamai uma ai i mai o le sami. O lea ua tatou malaga i vaa e ea malulu, ua mafai ona feaveai ai taavale. O aso ia e le mafai ona feaveai ai taavale i luga o vaa. Tatou te le toe fia foi e mumu i mea nei o moli popo. Na ou vaai i ai, e faala popo ona aumai lea fai ai le suauu e tuu i totonu o fagu, ona tutu lea ae mumu ai. O lea la sa tupu i nuu i tua i le 50 i le 60 tausaga talu ai.

O le tausaga e 1964 lau Afioga i le Fofoga Fetalai, o le tausaga lena sa faatoa ou malaga ai i Niu Sila. Ua 50 tausaga talu ai. Na ou lele i Tutuila, moe ai e pue le vaalele o Niu Sila e faaigoa o le TEAL. O le taimi lea a o mutia lo tatou malae vaalele i Faleolo. O le taeao o le aso na sosoo ai na faatoa pue ai lau vaalele ou te lele ai i Nandi ona toe malolo ai foi lea i le malae vaalele, ae na faatoa faaauau ma taunuu i le malae vaalele i Whenuapai a o le i tatalaina le malae vaalele i Magele i le ta o le 10.00 i le po. E silia i le 30+ itula. E lua aso o malaga faatoa taunuu le vaalele i Niu Sila. O le a le mea lea ua i ai nei? Ua saosaoa vaa ua tatou femalagaai ai i aso nei. Ua le o toe mananao o tatou tagata e toe ola i mea tuai sa tatou masani ai. E leai ma se isi o toe fia savali ona ua fia tietie taavale tagata uma, ioe, ua fia tietie taavale uma lava.

O aso la a matou omai i aoga i le 60 tausaga talu ai, matou te savavali mai i le auala i le vivini faalausosoo o moa. E omai ma avega aulama e tutu e faamalamalama ai le auala aua foi e leai ni tupe e faatau ai ni moliuila? E tafa ata ua matou oo mai i le magafa, ona fai ai lea o le matou tonu po o fea matou te agai i ai.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai, se Ministerial Statement le mea lea?

FOFOGA FETALAI: Malie lau Afioga i le Taitai o le Itu Agai, se i avatu pea le avanoa.

Afioga Hon Palusalua Faapo II: Ana faapuupuu ua uma le Tulafono Tau Faaofi.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Po o le agai i uta i le lisi ma agai atu ai i Falefa ma kiki kiki maa atu ai lava, po o le agai i Falealili. O le mea lena o lea e talagafa ai o matou nuu. Aua e te kiki kiki maa kiki kiki maa lava e totolo i le fale o lea i le fia ai, ae e le o le mea lena tou te talie mai ai? O le tulaga lena, faatoa maua le pasi i le faleoloa e tu faafeagai ma le fale o le faifeau lea e i Falefa, lea e i ai ogasima tetele lava i ina sa tu ai le faleoloa, o i ina sa tu ai le pasi. O i ina faatoa maua ai a matou pasi, ae e te savali mai tua. A alu atu lau taavale e tu i le auala laupapa i le Vaipu, ona e tilotilo lea i uta, e te vaai atu i le tamai ala sima lena e i uta i ina, o i ina matou te sopo ai ina ia aua ne i susu i luga o le Vaipu, ae a e oso mai i tai e te agai i Falealili, e matua e susu lava i le mulivai i le nuu lea o Salani.

O le faamatalaga lea e fai atu, ua le o toe fia savali ni tagata, ua televave ma saosasoa le soifuaga lea tatou te soifua ai. Ua fia maua e tagata taavale afi, ua le o toe i ai se isi e toe fia savali. A o fea le mea e te maua mai ai? O fea? O le mea lena o lea o lo o agai i ai le Tulafono Tau Faaofi. E te maua mai i galuega fou. E te maua mai i atinae e fai e le atunuu. O lea la faatoa malamalama Palu i le mea lea e agai i ai le lauga. E le mafai ona e malamalama i le lauga pe a e le vaai agai i tua i le mea na e sau ai.

Lau Afioga i le Fofoga Fetalai, o le tulaga lena. O lo tatou atunuu ua fia maua ni galuega. O le mea lena o lea e manao i ai. O lea foi e o atu soo tagata i le Ofisa e fia o i galuega ia e saili i Niu Sila ma saili i Ausetalia i le mea lea o tauga apu. E manaia tele tauga apu e maua ai foi musika manaia a lo tatou atunuu i tauga apu i mea o lo o fai ai. Lau Afioga i le Fofoga Fetalai, o le ala lena o lea e taumafai ai lo tatou Malo e saili galuega, o lea lava e mafai ona toso mai kamupani i totonu o le atunuu lenei. O lea lava la e tetee i le agaga o le Tulafono Tau Faaofi lenei lau Afioga i le Fofoga Fetalai, o lona uiga e le o atoatoa lona lagolagoina o mea nei e taumafai atu i ai le Malo e saili ni galuega mo a tatou fanau ina ia maua se lumanai manuia. O le ala lena sa agai ai se upu ina ia faafogafoga mai fanau nei a Samoa i le taua o le Fonousu a Samoa. O le faataua, o tatou nei o Taitai, e leai nisi o i silī, o tatou nei o Taitai na tofofi mai e o tatou itumalo i luga o le musumusuga a le Agaga Paia, tatou te omai i inei e faaoga taleni na foai fua mai e le Atua e matua atiae ai galuega. E le o taleni foi ia na lauga ai lo tatou Alii i le maumau o taleni le faaaogaina.

Lau Afioga i le Fofoga Fetalai, o le mea lea e agaga i ai le Tulafono Tau Faaofi lenei, ia matua lau mai ni pisinisi tetele e pei o le Yazaki lea. E tasi lava le fale faigaluega ae 1,000 po o le sili atu foi i le 3,000 tagata faigaluega e maua mai ai. O tatou uma lava i le Maota lenei lau Afioga i le Fofoga Fetalai, po o a o tatou pito i atunuu i fafo; o pito Toelau, Siamani, Amerika, Niue, Iapani, Saina, Toga, Fiti, Sikotilani, Uelese, Solomona ma pito Vanuatu. O a o tatou pito i na atunuu, se o tatou lea ua tatou matai uma lava i usuga-gafa. O lea foi ou te malamalama lelei i le tama lea o Lautalaletoa, o le matua Fiti auliuli mai lava i le tumuai e tau i mati'uti'u vae. O lea foi ou te malamalama i le tina Purinise Toga lea na o atu ma le Samoa, ona alu ane lea o le tama o Lautalaletoa fao, a o le Toga ma lona toalua Samoa. Ona uma lea, ona toe sola ane foi lea o le Toga nofo i le toalua Samoa ma omai ai. O le a le taua o le tala lea? A lea o ona suli Safotu, o ona suli Salega, Matautu, Aiga i le Tai ma Sataua lea e tumutumu ai le Maota lenei?

O le a tatou fefefe la o le a? O le a le mea o le a tatou fefefe ai i le faapea ina ne i te i ua omai ona omai lea i le Maota? A! ua tumu le Maota lenei i tagata mai fafo. O le mea lea se i silasila, o outou o lea ua ee i ai paia o faatumutumuga o nuu. O outou o tupu ma ee o le atunuu. O le ala foi lena na ou matai ai i tua ou alu fai lou igoa matai i Falelauvao. O le sao lena alii o le igoa o lo matou nuu, ae ua outou nonofo fua ma faaigoa isi outou fale i le igoa o lo matou nuu. Na ou toe matai foi i Fasitoo, o le uluai Aiga Sa-Tuala; e faamalulu atu Leulumoega.

Ona o le uluai Tuilaepa, o le atalii o le toeaina Lepa. O lona tuua o le toeaina e igoa ia Tuilapeta i Toga, toe Tuilakempa i Fiti. O le toeaina lea e ana motu foi ia i Fiti e eena tagata, lea e ala ai ona Polenisia le isi vaega o Fiti. Ou te le iloa le tama lea o Pani, ae masalo o se atalii o lena foi Tuilakempa. O le mea lea ua ou agai i ai lau Afioga i le Fofoga Fetalai e amata mai lava i lau Afioga i le Fofoga Fetalai, se ua pulepule le Maota nei. A o outou lava o tupu ma ee o le atunuu, ua outou umia suafa tetele o nuu, tou te le o toe manatu i na mea, i mea na outou omai muamua ai. E tasi lava le mea lea ua outou agai i ai o Samoa. O le manatu, se soia tou te fefefe vale i tagata mai fafo? Po o le sau o le Toga, Fiti, Saina, Iapani, Siamani, Peretania, e sau lea tilotilo, tilotilo, e aupito aulelei lava tausala Samoa.

Ua outou vaai i le faaaliga tausala lea sa fai a le Pasefika? O lea foi e sili ai le teine Samoa. Aua foi e aupito aulelei lava teine Samoa? E tafao, tafao mai lava lea e sau faaturisi tau mai i a tatou teine aulelei, ia ipo loa. O le a la le mea tatou te toe inoino ai i ia tagata mai fafo, a o lea ua omai nonofo i inei? E leai se tatou mea e mafai ona fai. O ai a melea ma faitio i le aulelei o tama ma le aulelei o tamaitai? Ona omai lea o latou nei mai fafo nonofo, faiava ma nofotane.

E i ai le tatou upu foi lea, "Na o Afono na mele ai manu." O le uiga o le upu, a omai i latou nei nonofo ma fai a latou pisinisi i inei. O le a le mea o le a fai nei pe afai e sau nei o le teine Samoa? A manatu faapea o le tama lea e sau mai Peretania lea e nofo i le teine Samoa, ona manatu lea i le teine Samoa ma le fanau Samoa lea na mafua ai ona omai ma nonofo mau i Samoa nei. E i ai le agaga lea ou te taofi e le o se agaga lelei tatou te faapea ai e omai ave pisinisi, a o lea ua tatou vaai lava i ai ia i latou e omai. E mafua ona fai a latou pisinisi ona o lea ua talagafa mai i Samoa nei.

O le mea muamua e faapea e leaga mea ia e oti ai pisinisi a o tatou tagata. E leaga le tulaga lea ona e leaga mea tau tupe. Lau Afioga i le Fofoga Fetalai, o

le a oo atu la i ai sau upu i le itu lea ona e taua tele. A faapea nei ua e faapea mai o lo o fai mai le Tusi Paia, o le faapogai o mea leaga uma o le tupe. Ia, tatou te matua faitau eseese lava i lena mea o lo o faavae ai le tetee i le Tulafono Tau Faaofi lenei, ona e pei e foliga mai o se mea leaga le saili tupe o le Malo e atiae ai. E pei o se mea leaga ma tatou te faitau eseese. O lea tatou te iloa o lo o manino le Tusi Paia i lē lava e vaai faapena. O le a le isi fetalaiga o lo o aumai i le Tusi Paia? Afai lava ua mu lou loto ma e le toe manao lava i se isi mea ua na o Iesu lava, o le a la le mea e fai? Fofai uma loa au mea ae alu e te mulimuli i le Talalelei, ae a le foaiina au mea ae e tutu mai lava iinei ma e fai mai o le mea leaga, o le a la le uiga o lena mea? A o lea foi e taua le upu a Paulo. O le a le upu a Paulo? O le e fai mai e faatuatua ae leai se galuega, o le faatuatua e mate, ma e faigofie ona faatupu galuega o le lava o seleni e faatino ai. Ae faapefea ona lava seleni e faatino ai? O le atiae. E faapefea ona atiae? O Tulafono. Ia vaai, o lea ou te lauga lava i le Tulafono Tau Faaofi. Ou te le o see ese lava i se isi mea. O lea lava ou te lauga i le Tulafono Tau Faaofi e faalautele ma saga faalautele. O lea foi e manino lava fetalaiga a Iesu, “A fai sou fale, muamua nofo i lalo ma faitau au tupe po o lava.” Vaai oe o le matua poto o lena fautuaga na aumai e lo tatou Alii? O le fautuaga la lena o lea e faaoga e le Matagaluega o Tupe e fau ai a tatou Tala o Tupe. E matua faitau auiliili seleni tatou te maua, ona faavae ai lea o le tatou Tala o le Tupe lea e faavae ai le tapenaina o Tala o Tupe a le Malo i luga o le faavae ua faataoto mai i fetalaiga a lo tatou Alii. Ia faitau muamua au tupe po o lava. O fai mai la le Alii e leaga tupe? E leai, aua foi o le faiga o le fale o se mea taua tele aemaise o le fausia o malumalu? E leai se malumalu i aso nei e te tatalo, tatalo lava te i ua tu mai le malumalu, e leai. A leai ni tupe e fau ai, e leai se malumalu e tu. E oo lava i maota o faafeagaiga ma maota o galuega, e mafai mea na ona o tupe. O le a la le uiga o upu ia? O le uiga a faaoga tatau seleni ona lelei lea o le tupe, ae a faaoga sese, ona leaga loa lea o le tupe ma tutupu mai loa lea o isi mau faafitauli e tele.

O le polokalame lea o lo o faataoto atu e le Tulafono Tau Faaofi, o le polokalame e ogatasi lelei ma le faaleleia o lo tatou tamaoiga. E ogatasi lelei ma Faataoto ia, “Nofo lelei i lalo ma faitau au tupe po o lava, a le lava fai i le mea e lava ai.” O le a le mea e lava ai? O le Tulafono lea tatou te talanoaina i le taeao lenei. O le popolega o le Vaega lea ina ne i te i ua pepe ai atinae a Samoa, e leai lava se atinae po o se isi o faia se pisinisi e pei o le Yazaki. O le ala foi lena na omai ai loa le Yazaki, e le i umi lava ona fai le iuga a le Kapeneta ae pasia. Ona o le naunau o le Kapeneta i le taimi o Tofilau a o Minisita o Tupe. O le naunau o le Afioga i le Palemia ina ia toso mai i totonu kamupani e maua ai le 3,000 galuega. E 3,000 galuega a o tatou tagata. O lea ua pau ifo i lalo i le 1,000 ona ua faapena foi ona malosia le tauvaga o lo o fai mai fafo. E leai la se isi pisinisi faapena, ae ou te lagona o mea faapena o lo o aumai i luga o le tulaga o le fefe. Afai o tauvaga a faletalimalo e mafua ai le manatu lea, o faletalimalo tetele e pei o le Sheraton Aggie, e i ai o latou faletalimalo tetele i atunuu uma lava o le lalolagi. O lona uiga la e fesootai vavalalata latou ma auina mai tagata turisi mai o latou lava faletalimalo e malaga mai i Samoa, e omai e nonofo foi i o latou lava faletalimalo po o le lala o lo o i Samoa nei. E leai la se mea e popole ai fua isi faletalimalo. E le o taofia lo outou avanoa e fai ai a outou faasalalaua tuusao i fafo. O le mea lenei ua leva ona ou talanoa ai i le aufai faletalimalo. A outou mananao e tosoaiina mai tagata asiasi maimoa mai i lou faletalimalo, o mea nei e tatau

ona e faia. Ia soso ese ma le faasalalau o tau o lou fale talimalo i tupe Amerika. E faigofie ona latou faatusatusaina ma isi atunuu, o loa i ai ma iloa ai le eseesea. Ave pea i a tatou tupe aua e maualalo le fesuiaiga o mea tau tupe.

O lona lua, ia lelei la outou tautua. E leai lava se isi e sau mai fafo pe a faaletonu la outou tautua.

O lona tolu, ia vaai i le tulaga e tau faataugofie ai a outou tau. Aua afai e taugata a outou tau i le \$10 ae taugofie Fiti, e o lava tagata i Fiti. A o le mea e fai e le fale talimalo, o le tulaga foi lea e tuu i lalo, ae a omai loa iinei soka loa i mainu ma meaai. E tele auala e mafai ona fai ina ia soka ai le tagata asi asi mai, a o lea ua nofo i lou fale talimalo. E foliga la e taugofie le nofo, ae sue au tupe i meaai ma mainu. O le faagaioioiga o le pisinisi, se e tele auala e faagaioioi ai.

Lau Afioga i le Fofoga Fetalai, o le tulaga lea i le fefe ina ne i omai pisinisi mai fafo ona pepe lea o a tatou pisinisi. O le tausaga e 1997 na tuli ai au e le Palemia ou te alu e faaulu le talosaga i Sineva i le lala o Malo Afaatasi o gafa ma le talanoaina o le World Trade Organisation, po o le maketi lea o mea tau fefaatauaiga i le lalolagi. Na ou alu i le masina o Iulai, na ou alu atu loa fai le lauga. Na uma le lauga, o le patipati ia o i latou uma sa i ai. Ona lauga mai lea o le Amepasa Rusia lagolago, lauga mai le Amepasa o Saina lagolago, lauga mai le Amepasa o Amerika, o Peretania na lagolago, o Kanata lagolago, Ausetalia lagolago ma Niu Sila na lagolago. Ona ou foi mai loa lea ae fai mai Tofilau, “E a le reception?” Ona ou fai atu lea, a fua i le pati lea na patipati ai, masalo pe na o le ono masina ua i totonu tatou. O le matua sese o lena forecast. E toetiiti atoa le 15 tausaga faatoa pasia tatou e avea ma sui o le WTO. A o le taua o lena mea, o lou sau i Samoa nei matou feiloai pea, feiloai pea ma le vaega lea a le Champer and Manufacture Association ona ou lapataia lea. O le taunuuga o le mea leni i le ulufale atu o Samoa i le maketi o le lalolagi e i ai le mea e tupu, e ui ina matalatala maketi o le lalolagi mo oloa e gaosia i Samoa nei, a o le a matalatala ai foi ma a tatou maketi e ulufale mai ai oloa mai fafo i ni tau e aupito taugofie i le tulaga e aupito sili ona maoae le maualuga. O lona uiga o le tauvaga o le a fai, “pull up your socks.” O lona uiga ia amata tapenapena, mai le 1997 i le masina o Iulai. Ona amata mai lava lea i ina ona tapena ma tapena. O lea e faamanatu mai lava e le Peresetene o le Sosaiete a i latou e gaosia oloa, e le o galo ia i matou lau faamanatu. Aisea? Aua foi o le Malo e lua lava mea taua i le Malo, ia mataitu lelei mai. Ona o lau matau i le aso ananafi, e tasi lava le mea na lilifa i ai. Na lilifa i le aufaipisinisi, ae galo le lautele o le atunuu. E 99% o le atunuu leni e leai ni a latou pisinisi. A o le vaiga lautele a le Malo, ia le gata ina puipuia le aufaipisinisi, ae ia puipuia foi le au faatau. Aua o le Tulafono e le mafai ona alofia e le aufaipisinisi, ia tele lana tupe mama e maua. O le a le uiga o lea mea? Ia matua tuu i luga tau e tele ai lana tupe mama e maua. So o se faipisinisi lava la e sau mai fafo ma fai mai, “O au nei ou te fia sau e faatu lau pisinisi i Samoa ona o lou alofa i tagata.” E tasi lava lau tala, “E BS uma mea na.” Ona pau lava le mea e naunau i ai le Malo leni ia maua ni a outou tupe se tele. Aua a maua ni a outou tupe se tele. O le a le manuia o Samoa e maua ai? O galuega. E maua ai galuega mo tama fanau a Samoa.

O lona lua, ia tologi a outou lafoga ona lava ai lea o tupe e atiae ai le atunuu e fai ai outou auala ma fai ai mea tou te mananao ai, outou ia e tetee mai i le

mea lea. O le aoga lena o mea ia, e le gata ina maua galuega mo o tatou tagata, ae atili faaopoopo mai ai tupe maua a le Malo e atiae ai lo tatou atunuu lea e faafogafoga mai.

O lea sa ou fesili atu i le sui usufono mo Faasaleleaga Nu.2 aua o ia lea na saunoa i le aso ananafi e faapea e tele mea e sue ai tupe. Na ou fesili atu se i tau mai, ae na o le lua mea na tau mai. Ae tau mai, o mea lava ia o lea e fai e le Malo. O mea la ia o lea e taumafai le Malo e saili ni auala fou. E le o auala tuai a o auala fou ina ia saga faaopoopo atili ai seleni e fai ai mea ia tou te mananao i ai, lea tou te lauga soo mai ai ma outou fai mai e le lava tupe a le Malo. Ae a liliu atu foi le Malo e fai auala e saili tupe ai, ae matou faalogo atu foi, oi, se ua matua mativa lava le Malo ua o ai i fafo. O le a lava le mea e agai i ai le Malo outou oso i le isi itu, laa i le isi itu ae outou oso i le isi itu, ae e le mafai, le mafai lau Afioga i le Fofoga Fetalai ona tuu le mea e tataua ona fai. E saili auala le Malo ina ia maua galuega mo a tatou fanau.

O le ala lena o lea e taua tele ai le mea lea o le ulufale atu o tatou i le WTO. O le isi auala tele lava e aoga ai le WTO o le mafai ona avanoa ai tatou i isi ituaiga tautua e tai pei o services. O le isi tupe tele lena a tatou o lea e maua o services, ae e le gata i lea o le tagata e mafai ona malaga atu i fafo ma e le taumate o i ina lea e mafua ai ona matalatala mai Niu Sila ma Ausetalia i le tatou polokalame lea o tagata galulue faavaitaimi. Lau Afioga i le Fofoga Fetalai, o le itu lena e taua ai pisinisi mai fafo e omai e faataitai i o tatou tagata faataitaiaga lelei.

O le taimi na amata ai le Yazaki, o le faitio ia o nisi tagata faigaluega, fai mai e fai faamanu le faiga o galuega. Ona ou alu lea fesilisili i ai, "O le a le uiga o lena mea?" Ona fai mai lea, e te tu mai lava i le taeao i le ta o le 8:00 faatoa e malolo lava ina ua ili le faailo o le a fai sina malologa puupuu, toe ili foi le faili e toe alu e te le malolo. Na fai atu lau tala, o galuega na o lo o fai i fafo e te le malolo. Afai e tolu itula e te galue ai, e te galue ai lava i le 3 itula. O lona uiga o lea e maua atu lau Afioga le auala iinei e train ai o tatou tagata.

O lea sa ou talanoa faalauaitale i le mea sa tupu i Ausetalia. E maua le 50 o le tatou aufaigaluega ma e tele atu tupe e maua i Ausetalia. Ona pau lava le latou mea e fai o le savali e piki le vine e gaosi ai le uaina. Ona pau lava lau mea e fai e te fealuai ma le seleulu ona e tilotilo lea pe i ai ni taufuifui vine, e te le tau punou i lalo. Ona e tago lea e oti, a i ai se vine leaga e oti ese ona tuu malie lea i lau ato. A maua le 20 ato fai mai le tatou vaega ua lava, a o la e 40 ato ua oo i ai le piki a tagata Toga. O tagata ia e o atu i Toga a tele lava lau piki ua tele foi lau tupe e maua. Ona fai lava lea o le mea lena o le 20 ato a le tagata Samoa ae 40 le tagata Toga. Ona feita loa lea ma fai mai o le faasusususu. E toe o atu le aufaigaluega ua fai le strike, ua fai le tetee a o tatou tagata ma fai mai o le fai faamanu o galuega aemaise o le au Toga ua faasusususu.

E le o tauina e Toga ni ato mo i latou, o lo o tau lava e Toga a 40 ato ua faaluaina lana tupe e maua. E le mananao le vaega lea e fai le mea lena. O lea na alu i ai le Faaululuga o le Ofisa o le Palemia ma tau i ai, "A outou toe faia loa le mea lena, o le a toe avatu uma outou i Samoa." Na ave ai ma lau tusi tala atu ananafi, "Afai tou te le ausia tulaga maualuluga o le mea e tataua ona oo i ai outou, e tataua ona oo i le 100 i le aso a outou ato ina ia tele ni a outou tupe e maua i le taimi puupuu lena ua outou o atu ai. O lea na faatoa amata ai loa ona oo i luga a latou ato.

Lau Afioga i le Fofoga Fetalai, o lea ua train atu i inei o tatou tagata i le mea e igoa o le galue, e te galue lava i taimi uma. O Niu Sila a e matamata i le Saina ae fai lona togalaau, e faatu mai lava i le taeao e ta lava le 6:00 i le afiafi o faatu lava ma toto ana laau. A alu atu la le Samoa foi lea ma tilotilo i ai, masalo po o le toaono Samoa e mafai ona fai le galuega lea e fai e le Saina i le aso e tasi, a o lea e galue lava i taimi uma. O le ala lena e tafao, tafao ai lava le isi taulealea, topetope le maumaga ua 200 tiapula sau loa ua tiga le tua. Aua foi e le masani ai i le galue, galue, galue i taimi? E faapena le training e maua mai i pisinisi mai fafo, e aoao mai ai i tatou ia tatou galulue e pei o tagata mai fafo. O le tele lava o taimi e te galue ai, o le tele foi lena o lau tupe e maua.

Lau Afioga i le Fofoga Fetalai, toeitiiti lava uma. O le mea lea o le tauva, ou te manatua lelei lava o le 1990 na tusi toatamai mai ai le isi faipisinisi, na o le pau lava lea o le pisinisi i le taimi lena latou te faia toilet papers, pepa o faleese. Na tusi mai e taofi le toe aumai o pepa mai fafo. Na faalii ai ina ua le amanaia lana talosaga, ae sau pea lava pepa mai fafo. Ona ma talanoa lea ma le Afioga i le Palemia ma ou logoina i ai le iuga lea o le a ou faia, ae teena. Fai mai le saunoaga a le Palemia ia te au, se faafetai ua e le amanaia. Ona ma talatalanoa lea ma ma talie, ma iloa ai, faapea lava au na te le o faia le mea lea ou te faia. O lou nofo ma aumai le toilet paper a le toeaina lea ma saesae. Ia manatua foi e saesae i vaega, saesae, saesae, saesae ma faitau loa, e 150. Ae aumai le pepa mai fafo, saesae, saesae, saesae e 300. E mafiafia ae faaluaina le tau o le pepa lea e gaosia i totonu o le atunuu i lo le pepa mai fafo. A o le pepa foi mai fafo e faapauta, e le gata ina a e tago e saesae ae e te fia sogisogi foi i ai i le manogi manaia. O le tulaga lena na ou tusi ai loa i ai ma ou fai i le toeaina, "Malie e le pei lau pepa o le pepa lea mai fafo, o le pepa mai ia oe a oo i le taimi e faapaia ai, e pei lava ua e toe foi i le pulu popo i aso la.

Lau Afioga i le Fofoga Fetalai, o le tulaga lena i le tauva. O le tauvaga e faatino ai le agaga o le Malo ina ia tataua ona vaai totoa i oloa nei e fai, ia talafeagai, lelei ma taugofie mo o tatou tagata lautele. Aua e tuufau loa a tatou pisinisi, o le mea la lena e fai e pei lava o le pulu popo le mafiafia ma toe mafatia ai ma le tagata e faaogaina.

Lau Afioga i le Fofoga Fetalai, o le tiute lena o le Malo. O le mea la lea, aua nei mama ia i tatou ia na sausaunoa faapea ua le amanaia a tatou tagata faipisinisi. Vaai oe i ai e tau le ma nofo le Sui Palemia i inei i le ave i fafo, Ausetalia, Niu Sila faapea foi ma Amerika Samoa i le uunaiina o a tatou oloa, ae fiu lava e uunai oloa, a le lelei ona fai ia sili atu i oloa mai fafo, e le taulia. O lona uiga, o lea e tutusa lava ona fai le afaipisinisi faapea foi ma o tatou tagata o lo o faalagolago mai i le Malo mo le puipuiga o latou.

E masani ona ou alu i le isi faleoloa ou te faatau ai, e ala ona ou alu ou te alu ou te matamata. E tumutumu lava le fale o Frankie ia i aso uma, aso uma, aso uma. Aisea? Aua foi e maua ai mea ia e affordable e tagata lautele? Ou te nofonono lava la ma ou faapea ane, o le a le mea ua le faataitai ai o tatou tagata ia i latou nei? I aso la ina ua faatoa tatala faitotoa o Iapani i le 1965, o le malaga atu a Commodore Bury o le Taitaiua na alu atu faamalosi le Malo o Iapani, tatala outou faitotoa, tuu lena mea fai mai e puipuia outou tagata e a ma a ma a. Tou te le manuia ai, tatala outou faitotoa. O le mea na fai e tagata o Iapani, o le o avatu uila, ona avatu lea o uila ua nonofo ma talai uila ma matamata i ai. Ona nonofo loa lea ma faataitai le faiga o uila, avatu alu le isi

tagata faatau atu le peni foi lea o le parker pen, ona tilotilo lea po o le a lava le mea ua ala ai ona taugata tele lea parker pen, ona nofo loa lea o ia ma fai. Ona pau o le mea ua iu lava ina maua, ua nofo ma tusi le P, koma i lalo ifo o le P, arker ona faapea lea o tagata o le parker, ae leai o le P,aker mai Iapani. O lea ua fai, fai lava ua matua maoae Iapani i le faiga o oloa mai fafo, faataitai, kopi, faataitai, kopi, faataitai.

O le mea foi lena e tatau ona fai e tatou, le aufaipisinisi, kopi, faataitai, kopi, faataitai. E faapena le tatou mea na fai, na tatou o i Fiti, e o atu o fai le latou festival, le hibiscus festival. Ona tatou o atu lea matamata, matamata kopi, omai lea fai le tatou Teuila Festival i le 1991. 1993 fai le latou festival, ou faitau atu i le pepa, ua tatau ona tapuni le tatou ituaiga festival lea e fai, ae tatou o i Samoa e kopi mai le latou festival, a o le tatou festival na kopi mai Fiti. Ona tatou omai lea, e ese le faiga ua sili atu, a o lea fai mai Fiti e omai e kopi atu, ae latou te le iloa na tatou kopi mai ia latou. Se o mea faapea, e fekopiai, e fekopiai lava. O le faiga lena o mea o faipisinisi e ola mafaufau, ae a fai mai loa le faipisinisi o le a oti le tatou pisinisi, o lona uiga o le faipisinisi lena e pe le mafaufau.

Lau Afioga i le Fofoga Fetala, o le taua o le mea lenei o le Tulafono o lo o faatino e le tatou Malo atinae ma galuega, na pau lava lena. O le agaga lena o le Tulafono Tau Faaofi, atinae galuega i auala fou.

E i ai lava si mea sia e tatau ona oo pea i ai se faamatalaga lau Afioga ona e taua tele, o le tulaga lea o le Tulafono o le Lisiina, tasi lea Tulafono e pei lava o le Tulafono foi lea o le lisiina o fanua faaleaganuu e faaoga i ai le anoano o fanua lele e le o faaogaina e maua ai seleni a aiga. O lea ua tatou vaai i ai i le manuia o lea foi Tulafono sa matua teena, teena. E oo mai nei lava o lea e i ai isi matai ia e feoai i Apia nei e le o fia o i ni nuu, faaali le tele o le latou malamalama. O ituaiga manatu la ia, talofa, o le tofi mai le Atua, talofa i le tofi mai le Atua. O lea ta te faalogologo i upu a tagata e fai i o tatou tofi, o tatou tofi, o upu a tagata e fai, o lea ua maua loa le tofi le toe iloa mai. O le a le aoga o lenei tofi? O lea ua alu atu lava i Apia nofonono ai. O le a le aoga o lea tofi? E faapena foi le upu i eleele nei. O le a le aoga o tofi mai le Atua? O le a le silasila mai a le Atua i le tofi, ae tutupu ai tavai ma mosooi ma laau le aoga o lenei lalolagi e le o faatoaina? O lea ua aumai manatu, a o matou nei e feoai e asiase ma mataitu le anoano o tatou eleele e le o galueaiina. O le tele ia o polokalame lea e faataoto atu nei e le Malo e taumafai e activate ai, galueaiina ai o tatou eleele, e le o faia. Ae ou te lagona lava, o le isi lea mea ua faigata ai aua foi na ona matua ae lava o le atalii o lea ave i fafo, matua ae le atalii o lea sue le manuia i Niu Sila. E i ai le toeaia sa ma talanoa ona ou fai lea i ai, "Sole, e ese le manaia o lau fagaga, amuia oe." Ae fai mai le tala a le toeaia, "Oi a amuia, o le fagaga nei o le matua tele o poa tetele ia e i ai, a o le faalavelave ua leai se tama e faalaloe pe a tupu mai faalavelave, ua lapopoa lapopoa na o le omai o meaituaolo ma tilotilo mai ia te au pei ua ula mai ia te au, ua ou le mafaia se mea. Ia, na o le aai aai lava omai talitaliaga mai i ou luma pei e taufaaililili, ia o le mea la ua tupu na o le fai ma ou alu aumai pusaapa fai i ai, ua ou lelava mulu se puaa i luga o le ogaumu. O lea la ua ou tusi i lou atalii e toe foi mai, sau e tautua au. O le mea la lena o lea ua tupu nei i le tele o tatou nuu, ua fai ma auina i fafo le tele o taulelea e o e saili ai o latou manuia, ua tele ina tuulafoai eleele. Ae faapefea le mau lea e faapea mai, talofa i le tofi ua le faaogaina. A o le a le silasila mai a le Alii i le tofi na aumai ae taatitia e le faaogaina? Se o la e soisoi le Alii i le le faaogaina,

a o ai e amatamea i mea faapenei? E tatau lava ona amatamea le Malo e le faapea foi e faamalosiā, e pule lava le tagata ia i lona fanua, a o lea ua i ai le auala e mafai ona faaāoga i le lisiina o eleele faaleaganuu e maua ai tupe a aiga. Ia e lua la faletalimalo tetele lava o lo o i ai nei, o la e i Siumu nei ma le faletalimalo i Lefaga, faapena foi nisi o afioaga i Salafai. O lale ua aeaē ai aiga, aeaē ai nuu, aemaise lava le faletalimalo lea pei o le faletalimalo o Lefaga, aua foi e maua ai tagata faigaluega, e le apaapa tele atu i tua i nuu, aisea? Aua o tagata e mamao ese ma le nuu, e tuai atu i galuega, e vave ona toe o. O lona uiga, o atinae nei e fai i totonu o nuu e pei foi o le faletalimalo o Aggies la e i tua i Faleolo, o tagata lava o la e nonofo ai i tafatafa, la e maua ai galuega ma aeaē ai i tulaga o atinae ua maua ai galuega a fanau. Ae oo mai lava i le aso, o la e lava e faitio lava i le tulaga o le Tulafono Tau Faaofi lenei.

Lau Afioga i le Fofoga Fetalai, o le tulaga lena, e le soona faia e le Malo ni Tulafono e afaina ai le tatou atunuu. Na ona faataoto lava ona tuu atu lea i le toeaina. O lena foi Tulafono, sa matuai fai fonu e tele iinei i Upolu, fai foi le fonu i Savaii ae Taitaifonu ai i le Komiti Faapitoa na faatu le Susuga ia Oka Fauolo. O le latou lipoti mai i totonu o le Malo, faagasolo le Tulafono ua malamalama le atunuu, o le latou finagalo faaauau le Tulafono. O lea la e aeaē ai nei isi afioaga ua maua ai a latou seleni i le tulaga o mea tau lisi.

I le Tulafono Tau Faaofi lau Afioga o lo o ua talanoaina nei, o lo o faaāoga lelei ai lava le tagatanuu ina ia fai se sao āoga mo le atinae o Samoa. E leai se sao o le mea lea i le atinae o le atunuu, a o lea la ua faaāoga le tagatanuu e fai so latou sao. Nei e mafai lava ona e sau oe o se Siamani, poo se Peretania e nofo i le teine Samoa ma e aiafu ai lava i Samoa nei mo le lima tausaga, maua loa lou tagatanuu, ae na o le aiafu lava, fealualuai ai lava. Na pau lava le mea ua atoa lou lima tausaga o e faapeapea ai lava iinei, maua loa lou tagatanuu, ma e fealuai lava iinei, lou tagatanuu. A o le Tulafono o lo o aiaia nei, na faamaonia loa le atinae, na fuafua i ona itu uma ma ua faatino, ona maua lea o lona tagatanuu i le tolu tausaga e te faatalitali ai ae le o le lima tausaga. O lona uiga, ua faapuupuu lou taimi faatalitali i le tolu tausaga. O le auga atoa lava lena o le Tulafono Tau Faaofi, na pau lava lena o le faatosina lenei, e laitiiti lava le suiga, faapuupuu mai le lima i le tolu ona maua lea e le tau faatalitali i le lima. Ae a leai se Tulafono, e mafai lava ona e alu i le mea tuai, maua lou sitiseni i le lima tausaga. Na pau lava lenei, o le a le maua la le faamanuiga tele lea o lo o uunai atu e le Tulafono. Ia ona foi lava lea i le mea tuai e te tafao tafao lava ma e eva i le laufaumalu, tei lava lea ua maua, a o le mea lea e faaāoga, ia faaāoga le tagatanuu i si tamai faatosina lava lea, ua le lima ae tolu tausaga e faataitai ai. E lamoi lamoi le faatosina, a o lea ua ou matau atu, toeitiiti lava momole ai isi o outou ua fefefe, tetee. O le lalolagi lenei lau Afioga i le Fofoga Fetalai o tatou i ai, o i tatou na tofofi mai e tatou itumalo, o lo o tupu pea le faitauaofai o tama fanau a Samoa, ma ia tatou lototetele e saili auala e manuia ai a tatou fanau. E le faatali le taimi ma le tai fanae se i tatou lava tapena. E le faatalitali foi le fia fai fanau se i lava galuega. O le Malo e magafagafa e le moe, e gaoioi i taimi uma, e fuafua ma faataoto faavae e saili ai tamaoāiga mo fanau a Samoa i tausaga uma. O le ala foi lena e faataua ai mea nei o Tusiga Igoa Fuainumera, ina ia maua e le Taitai o le Malo ma lana Kapeneta le tuputupu ae pea o tamaiti o le atunuu lenei, o i latou o lo o mamai ma i latou e tatau ona togafitia, aisea? Leaga o i ina e agai uma i ai fuafuaga a le Malo. E tatau ona silasila mamao Malo i aoaoga ma togafitiga, o galuega e tatau ona fuafua mamao e tua i ai fanau. O

le eseeseega lena, o tatou uma lava e i ai Samoa e nofonofu, ae e le nofonofu le Kapeneta, e tapenapena i taimi uma. O le faamaoniga o lena mau o le Tulafono lea ua i lumamea.

Lau Afioga i le Fofoga Fetalai, o lau tamai agiagi lena e lagolago atili ai le Tulafono Tau Faaofi. Soifua ma ia manuia.

FOFOGA FETALAI: Malo, faafetai saunoa i lau Afioga i le Palemia. E manatu foi o lea ua faaatoa i le taeao nei le tuleiga ma le saunoaga sa tatou i ai i le aso ananafi, ona o le faanaunautaiga lava a lo tatou Malo e faapupula ma faalatele le aano moni ia ma le ioimata o le tatou Tulafono ua opea i le Maota.

Susuga Papalii Lio Faavaivaiomanu Taeu Masipau (Faasaleleaga Nu. 2): Lau Afioga i le Fofoga Fetalai, talu ai ona o lea sa taua le lauga a Faasaleleaga Nu. 2, e ao foi ona faamalamalama leaga o lea e faafofoga lou itumalo i le faavae na ala ai ona ou laga le tulaga lea. E le umi lava lau Afioga.....

FOFOGA FETALAI: Ia faapuupuu mai le sui usufono mo Faasaleleaga Nu. 2, o le a avatu pea le avanoa ona o lea sa.....faapuupuu mai.

Susuga Papalii Lio Faavaivaiomanu Taeu Masipau: Lau Afioga i le Fofoga Fetalai, o le faavae o se manatu o Faasaleleaga Nu. 2 e le o ni auala fou a o auala ua tuai taimi o.....

FOFOGA FETALAI: Malie lava....malie ua fai sina pau ia te au o le tulaga lea, ua galo ia te au o le lauga a le Afioga i le Palemia o le Ministerial Statement, e faamalulu atu ia ona o tulaga e.....

Afioga Hon Palusalua Faapo II: Lau Afioga i le Fofoga Fetalai o se mea e fia malamalama ai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nu'u ma Afioga ma Agafesootai): Lau Afioga i le Fofoga Fetalai e tulai atu ma le agaga faaaloalo ona o le Saunoaga a le Afioga i le Palemia ona o lo o i le Tulafono Tumau, o lea ou te faatu ai le lafo, *Ina ia faataatia i le Laulau a Fono le Saunoaga Faaminisita a le Afioga i le Palemia, o se Saunoaga ua matua pupula ai mata ma malamalama ai finagalo o lena taeao.* Ma le faaaloalo.

Faaluaina e le Minisita mo Galuega Tau Alamanuia ma Atinae a le Malo, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nu'u ma Afioga ma Agafesootai.

Afioga Hon Palusalua Faapo II: Lau Afioga, ou te le faaluaina.

FOFOGA FETALAI: Ia.

Afioga Hon Palusalua Faapo II: Ae na o sina mea e fia malamalama ai.

FOFOGA FETALAI: Ia o le a se i avatu muamua la le fesili ona e tatau ona faataatia muamua le fesili i le Saunoaga Faaminisita a le Afioga i le Palemia.

Na faamaonia le lafo ma tulai ai le Saunoaga Faaminisita a le Afioga i le Palemia ua faataatia i luga o le Laulau a Fono.

FOFOGA FETALAI: Ia e manatu e faamalulu atu Papalii, ona o lea ua agiga i le Maota e avanoa le Saunoaga a le Afioga i le Palemia pe a faataatia le Lauga i luga o a tatou tulaga masani.

Tulai mai lau Afioga i le Taitai o le Itu Agai.

Afioga Hon Palusalue Faapo II: Faafetai lava mo le avanoa. E le fesiligia le Saunoaga Faaminisita a le Afioga i le Palemia, e pau lava le mea ua ou fesiligia, o lea ua tali e tusa ai ma Tulafono Tumau, o lea ua tali le Saunoaga Faaminisita i mataupu na laga. O lea ua ou tulai ai, e tatau ona tuu le avanoa i nai sui usufono mamalu o lea ua lagalaga mai le tali a le Afioga i le Palemia, ae o lea ua faaoga lona avanoa i lana Saunoaga Faaminisita e tali mai ai.

FOFOGA FETALAI: O lea se i avatu lau faamalamalamaga i le itu lea le Taitai o le Itu Agai? E le mafai ona tatou aiaina le Saunoaga Faaminisita pe a agai e fai Saunoaga Faaminisita i tulaga lautele, po o a lava taga o tu ma aga e faatulaga ai se Saunoaga Faaminisita, ia o le pule atoatoa lena a le o lo o saunoa i se Saunoaga Faaminisita, a o lea e avanoa lava a tatou faiga faavae. O lea ua faatu le lafo e le Kapeneta e tusa ma aga masani, ai tatou talia lea o le taimi o lea e faagasolo le tatou galuega nei. E pei lava ona ou taumafai e faapulapula atu i le taimi ua sola, we are in the construction process, e faasolo ai taunuuga o le tatou galuega, lavapapale le Maota, faasolo mai outou finagalo ia ona i ai lea o le taimi.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te le tali, o le Sui Palemia e agai i ai e tali atu i mea ia. O lau tautalaga, o le tautalaga mai i lou fatu, e agai tonu lava i le mataupu lea, ae ala ona ou taua saunoaga, na o se mea e faamalamalama ai, a, ae le o se tali, na ona ia atili malamalama ai ae le o se tali, e i ai le taimi e tali atu ai le Sui Palemia, o le Sui Palemia lea e agai i ai ia ana mataupu, o le Tulafono foi e le o sau Tulafono, ina ia manino i le sui usufono pei o lea e tau aoa le pupula a le sui usufono, ae ou te le i tali lava i se isi o latou, o lea ou te vaai atu e tolu itulau o le tali a le Sui Palemia lea e faatali, ua leva ona fia auato ai outou, a o lea lava e olo lava fua.

Afioga Hon Palusalue Faapo II: Lau Afioga o se mea e fia faasao.

FOFOGA FETALAI: Ia.

Afioga Hon Palusalua Faapo II: E sao e le o se tali a o le togafiti, o le togafiti e taofia ai lauga a sui usufono.

FOFOGA FETALAI: Malie lau Afioga i le Taitai o le Itu Agai, na o le tasi lava le tagata e taofia atua le lauga na o au.

Susuga Hon Tuilaepa Fatialofa Lupesoliai Aiono Neioti Sailele: Lau Afioga i le Fofoga Fetalai, e le o se togafiti foi, o le faalavelave la lena o le isi lea sui usufono sa aoao lelei e Tofilau, ia manatua foi e tu loa Tofilau, strategy, strategy, a, e le o le togafiti la a o le strategy.

FOFOGA FETALAI: Ia Papalii.....

Susuga Papalii Lio Faavaivaiomanu Taeu Masipau: Lau Afioga i le Fofoga Fetalai, leai e usitaia lava le Nofoa, ia a o lo o faalogologo lou itumalo, faapea ai o ni auala fou lea ou te lauga ai, leai o auala lava o lo o i ai i le taimi lenei, o le ala foi lea o le fautuaga ua avatu i le Malo, leai, o lea ua i ai auala i le taimi lenei, e pei ona ou taua auala e lua ananafi, a lea ua tofi le Afioga i le Minisita mo Galuega Tau Alamanuia ma Atinae a le Malo lea o le a faauluulu i ai le tatou Faalapotopotoga, aua na o le tolu lava faalapotopotoga lea e gaoioi mai i le taimi lenei e fai mai le sao i le Malo, ae toetiiti 30 faalapotopotoga, o lea la ua i ai le isi auala lea, ou te talitonu o le a mulimuli mai.

Lona lua o le Lipoti a le matou Komiti o le Tiute, e tele a tatou tupe la e tanu i tai. Ma le faaaloalo lava lau Afioga.

FOFOGA FETALAI: Malo. Ia e le o ai avea le saunoaga aemaise foi o le faafogafoga a lo tatou itumalo, o lo o manino ma malamalama lau folasaga ananafi. Ia se i tulai maia le sui usufono mo Satupaitea.

Afioga Hon Lautafi Fio Selafi Purcell (Minisita mo Galuega Tau Alamanuia ma Atinae a le Malo): Lau Afioga i le Fofoga Fetalai, faafetai mo le avanoa. E tulai atu leaga o lea ua faalua ona taua e le sui usufono mamalu mo Faasaleleaga Nu. 2 lou igoa i lenei taeao. O le faasaoga o le tulaga lea, o mataupu uma lava ia ua e saunoa i ai o lea ua tuu mai ia te au, atoa ai ma le Lipoti lea sa ou Taitaifono ai mo le taimi umi lava, ona tuu atu lea i le sui usufono mo Falelatai ma Samatau i nai masina mulimuli, o mea uma lava na o lea ua tilotilo i ai le Malo lea ua uma ona talanoa ai le Malo, faaopoopo loa i ai ma le Tulafono lea, ia ona maua loa lea agai i luma, a o mea uma ia ua uma ona talanoa i le Malo ma ua uma foi ona faamalamalama mai ia te au. Ma lou faaaloalo.

FOFOGA FETALAI: Malo, ia vaai la o lea ua manino ma malamalama le agaga o le Afioga i le Minisita.

O le a faagasolo le tatou galuega le sui usufono mo Gagaemauga Nu. 2.

Afioga Tafua Maluelue Tafua (Aleipata Itupa i Lalo): Malie lau Afioga i le Fofoga Fetalai, ae le i saunoa le sui usufono, ma lou faaaloalo ou te tulai atu e tusa ma le vaega 62 o le tatou Tulafono Tumau, e talosagaina ma le

faaloalo lau Afioga pe maua mai ni a tatou kopi o le Lauga o le Saunoaga Faaminisita a le Afioga i le Palemia, ma le faaloalo.

FOFOGA FETALAI: Ia, o le a i ai se taimi. O lea e faafofoga atu le Failautusi, ua outou vaai mai, 1, 2, 3, 4, e 18 computers ia e live le tatou Hansard. O lona uiga e tatau ona maua nanei pe a faapea e talafeagai ma tulaga o tu ma aga o a tatou Tulafono Tumau.

Tulai mai le sui usufono mo Gagaemauga Nu. 2.

**TULAFONO TAU FAAOFI O TULAGA TAGATANUU I LE
TEUFAAFAIGALUEGAINA O TUPE MAI FAFO 2014
– felafolafoaiga faaauau i luga o le faitauga faalua**

Tofa LEVAOPOLO TALATONU (Gagaemauga Nu. 2): Faafetai i lau Afioga i le Fofoga Fetalai ua maua so matou avanoa. Leai sa taputapu lava ae saausi lava le faalogologo i le manaia o le fagogo a le Afioga i le Palemia i leni taeao, e pei lava ua ou toe faalogologo i le fagogo foi lea o Risati ma lana au palapala, lea sa masani ona faasau i nusipepa ae manaia tele i le faalogologo. Ae talu ai o le lauga, ia o lea o le a ou tali atu i le tulaga o le lauga lea sa fai.

O le mataupu leni lau Afioga i le Fofoga Fetalai, ia e faapena foi ona liua Tua ma Alo i se lagona foi ia te au ia, e tele finagalo ua faaalua foi a le atunuu e taiepi foi o le mea lea ua saunoa ai le Afioga i le Palemia, o le a masofa le Faavae sa tusia e o tatou tuua ua lagomau mai tia, ona oo lea i ai o sau tilotilo i ai i le tatou Faavae – ma o lo o manino i le Fuaiupu 13 i le tulaga o aiatatau ma saolotoga o le fegasoloai ma le nofomau. O lea la e manino mai ai o lo o tatala, sa tatala mai pea e tuua le tulaga lea o le Tulafono lea pei ona aumai nei e le Tulafono lea, le tulaga o lo o faataua mai ai ia sootaga faaleuo ma isi atunuu, i le lē noatia lea o le Malo e fai se isi Tulafono faapea, ona ou fesili lea, o le a ituaiga sootaga faaleuo lea e talanoa mai ai le Faavae, ia ona ou manatu laia o sootaga faapisinisi, ia po o sootaga foi ia e fesoasoaniai i taimi foi ia pei o mala faanatura lea tatou te molimauina. O le mea lea sa tatau ona fai aua ua leva ona tatau ona faamanino le mataupu lea ona o le tele o finagalo faaalua o le atunuu. E leai e le o tatou, e le o se mea fou le mea lea, o lea tatou te sosolo i se faatofalaiga a tuua sa faufauina le tatou Faavae lau Afioga i le Fofoga Fetalai, ae peitai lau Afioga i le Fofoga Fetalai, e ui lava ina tatala ae o le feau taua ma le faamanatu lea e aumai ai, o le last option lea a so o se faigamalo, o le last option o le fai o le tulaga lea pe afai ua matua leai lava se isi auala e toomaga i ai.

O le mea la lea lau Afioga i le Fofoga Fetalai, o se mataupu e maaleale, o le loto e tofu gata le mataupu leni, o le mea foi la lea e avatu ai nai a matou tuualalo e faufau ai le Tulafono leni, aua o lou lava talitonuga, e tatou te aapa loa i le mataupu leni, e manino lava le mea o lo o faaali mai ai, ua tatou saili mapusaga foi lea, a, ua tatou fiaola ua tatou ausulusulu, ua tatou le mautonu, ua samuki lo tatou mafai i se mea e toe faaleleia ai le tatou.....Lau Afioga o le Schedule Ministerial le mea lea.....

FOFOGA FETALAI: Malie le sui usufono, se i avatu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o se mea e fia faasao, o le a tauau ina toe sese atoa le tatou mataupu i le saunoaga lea na tulai mai nei, e leai ni last option o i ai, e matua sese tele lea faaupuga, e matua leai lava ni last option o aumai ai i ina, o le tulaga lena. Ae pei foi ona ou tauina atu, e mafai lava ona tatou alu faapeapea ai lava, a, alu faapeapea ai lava, ae pau o le mea o le Teuteuga lea, na o le pau lava lea o le faatosina lea e avatu o le tipi o le taimi faatalitali ma le lima i le tolu, ae a e faaopeopea ai lava, o le mea lava e tasi, ae leai la se manuia o tatou e maua mai ai i le tulaga lea o lo o agai mai ai le Tulafono, ona e i ai tagata e mananao i ai i le mea lena, o le tolu tausaga, i lo le umi o faatalitali. Ae afai lava e faatalitali, ia o le mea lena e faaleiloga ai lava faapea. O lona uiga la, o lea lava e tate square one. O le ala lea ou te fai atu ai, o le matua sese i Sini o lau mataupu lena e aumai.

FOFOGA FETALAI: Tulai mai le sui usufono e faaauau le saunoaga.

Tofa LEVAOPOLO TALATONU: Lau Afioga i le Fofoga Fetalai, o le Doctor of Laws, ae le mafai ona interpret le Tulafono lea, o le a aveese ia le upu last option, ae tuu i ai le desperate option, a, pe sili ai pe a fai faapena.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga, ua atili ai ona faavalevalea le tatou mataupu.

FOFOGA FETALAI: Tulai mai le sui usufono.

Tofa LEVAOPOLO TALATONU: Lau Afioga i le Fofoga Fetalai, ia o le mea lena ua ta alofa atu lava lenei itu i ina aua ua ta vaai atu lava foi lele i se tulaga faaletonu, ae sili pe a togi mai le solo pe a ua fia togi le solo.

FOFOGA FETALAI: Aua e te faalogo ia Aeau ae lauga oe, saunoa oe i lou finagalo ae aua e te talia le tuualalo lea e.....

Tofa LEVAOPOLO TALATONU: Ioe, togi mai le solo, ona matou faia lea e aunoa ma le.....

FOFOGA FETALAI: Malie le sui usufono, se i avatu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, vaai i le umi o le lauga na avatu nei, a, ia o le isi lea sui usufono sa matua tetee lava i le suiga o taavale afi, lea sa i ai le latou manatu o le a tutupu mea ia, a? Ia e leai lava ni mea o tutupu, a o lauga lava nei, o lauga lava nei taufaafefe.

Lau Afioga i le Fofoga Fetalai, ua tatau, vaai i le umi o avatu ia mo mea o faamatalaga faataitaiga e tau atu ai mea sa fai e le Malo, folafola o le a tupu lea mea, e leai se mea na tupu, a, na iu lava ina teva atu ai ia Palu i ina, aua sa matua talitonu, talitonu o le a feoti tagata, ia e leai lava ni tagata o feoti i se 700 pei ona faapena, ae oo mai nei lava, o lea e musu lava e io mai, a? i le sese o lona faauigaina. O le ala lea ou te fai atu ai, matau le tau, aua le popoto e matau le tau, a oo loa ina e vaai atu ua sau ao o le a timu, a? Aua le popoto

e matau le tau, ae le iloa ona matau uiga o upu o lea e avatu, o lea e faamanatu atu. O mea sa fai atu, savali tetee, sau, e leai lava ni mea faapena o tupu, fai atu lea mea i le Malo savali tetee, sau, e leai lava ni mea faapena, a? fai atu lea fuafuaga a le Malo, savali tetee, ae faatino ane, e leai lava ni mea faapena.

O le ala lena o lea ou te tutu soo atu ai e avatu faamatalaga nei leaga o mea ua uma ona tatou asaina, o upu lava nei e le faapea e fou, o upu lava nei, talofa i le tofi, talofa i le a, e leai lava ni mea o tutupu.

Afioga Hon Palusalua Faapo II: Lau Afioga i le Fofoga Fetalai o se mea e fia faasao leaga ua taua lou igoa i le saunoaga a le Palemia.

FOFOGA FETALAI: Malie le sui usufono mo Gagaemauga Nu. 2.

Afioga Hon Palusalua Faapo II: O lea ua tilotilo le Afioga i le Palemia i le isi itu, a o le isi itu, o le a lau mea o fai nei i taavale la ua tutu ua leai ni parts, ua ufiufi i lalo o ulu ma talie? O le mafuaaga lena, ua matua pologa le atunuu i le taugata. O le ala lena o lea ou te fai atu ai, ae taitai ai le Sui Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le ala lena e i ai pisinisi o Inisinia. O lau mea tele lena o lea e fai. E le i mamao nei masalo pe a outou faafogafoga mai i lau lauga o le Kerisimasi ma le Tausaga Fou. Sa ou fautua ai i o tatou tagata, sole, se aumai ni nai mea fou e feoai ai nai matua ae aua le aumaia ni mea salukuluku aua e iloa foi e nai matua le mea o le a pala ae aumai lava. Ou te malamalama i ai i le mea lena leaga o Au e toai atu i ai talosaga a tagata i tulaga faigata ia. O le tulaga lena, masalo ana e nofo ai pea i Ausetalia ae tusi atu se isi o lo outou aiga e aumai se mea fou, e te aumaia foi se mea faapena. E le faapea o nanaina i lalo, sa matilatila lava lau talanoa i le atunuu a o faafogafoga Samoa. O outou nei i fafo, aumai ni meaalofa ma nai matua, aumai ni mea fou ae aua le aumaia mea tuai aua o le ala lena e vave ai ona faaletonu taavale ona e aumai ua leaga.

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama.

FOFOGA FETALAI: Ou te manatu ua malamalama lau Afioga i le Taitai o le Itu Agai.

Afioga Hon Palusalua Faapo II: O lau Afioga i le Palemia na faia le Tulafono e 12 le matua o le taavale ae aumai. O oe na faia le Tulafono, a o le a le mea ua e toe tatalo ai i le atunuu e aumai ni taavale fou?

FOFOGA FETALAI: Malie se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o outou lea na talosaga mai. O outou na talosaga mai ia alofa i le atunuu ia tuutuu i tua. E sao e leaga, e i ai taavale e tiga ona umi ae lelei lava ona e lelei ona tausii. E te fiu lava Palu e

faafenumiai mea, o le ala lena sa aumai ai saunoaga, ae e le mafai ona fenumiai lou sasi tele i lou alu atu i ina ae e le i faapea na malepe ai le Vaega lenei. O le tulaga lena na ala ai ona faaumiumi le Tulafono Tau Faaofi, ona o le tagi mai a outou na i le Itu Agai, se i tuutuu agai i tua leaga e i ai taavale e mafai ona tuai a o lo o lelei lava. Ia, o le tala lena.

Afioga Hon Palusalue Faapo II: Lau Afioga i le Fofoga Fetalai, se i faasao lava le mea lea.

FOFOGA FETALAI: Ou te manatu ua malamalama - malie le Taitai o le Itu Agai, o le a tuu le tatou mataupu a o le a tatou agai i taavale afi ae le pasia le Tulafono Tau Faaofi.

Afioga Hon Palusalue Faapo II: E leaga ua tuuina le Itu Agai i le tuu i tua o le Tulafono Tau Faaofi, o le faapeleina o le atunuu.

FOFOGA FETALAI: E leai o tatou uma lava, e oo foi ia te au na ou talosaga i le itu lena.

Afioga Hon Palusalue Faapo II: A o lo o oi ai le atunuu.

FOFOGA FETALAI: Tulai mai le sui usufono mo Gagaemauga Nu. 2, ou te manatu ia faatea lea mataupu ua manino ma malamalama.

Tofa LEVAOPOLO TALATONU: O lea faatoa 42 sekone o lau lauga a o lea ua – ae ui o lea e le afaina leaga o toeaia matutua.

O le isi vaega lea ou te fia fesili atu ai i lau Afioga i le Sui Palemia e ana le Tulafono, o le a se toatuga o i ai le tatou Investment Bill lea sa fai muamua lea ua uma ona pasia, a o lea ua toe aumai nei ma le Citizenship Investment Bill? E tasi lava le faamoemoe ma le autu ua aumai ai mea ia e lua, o le tau sailia o se tupe. O lo o tatou molimauina le solosolo lelei o le Investment Bill.

FOFOGA FETALAI: Malie le sui usufono se i tuu atu le avanoa i le Sui Palemia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai o se mea e fia faasao. E leai se mea o toatuga ai le Investment Bill. O le Investment Bill lea masalo pe sa pasia po o le lua tausaga talu ai, e ese foi le mataupu e agai tonu i ai le Investment Bill ese le polokalame lenei.

O le mea e fia faasao lau Afioga i le Fofoga Fetalai, o lalo i le Fuaiupu 13 o le Faavae, o i ina tonu lava e agai ai i faiga paaga a Faigamalo e i ai feagaiga faava o Malo i le va o le tatou Malo ma isi Malo o le Pasefika. E i ai feaatauaiga, o lea sa saunoa malamalama le Afioga i le Palemia i le isi faiga ua avea ai i tatou ma sui auai o le WTO, o le tasi lena faiga faapaaga. O lea foi e faatalatalanoa i le taimi nei i totonu o le va o Niu Sila ma Ausetalia isi foi faiga faapaaga i le tulaga o feaatauaiga ina ia fesoasoani uma i le tatou atinae.

O le mea lea e tupu ma ua mafua ona ou fia faasao le mataupu lau Afioga i le Fofoga Fetalai, leaga o lo o saunoa mai le sui usufono o mea ia na agai atu ai le Palemia ma au e tali atu i mea nei. Ua uma ona saunoa malamalama le

Palemia o mea na ua uma ona fai ma o lo o faaauau pea i le taimi nei. E leai lava se mea e le i oo i ai le silasila a le Malo ma faaauau pea le tulaga – o le ala lena e maua mai ai pea fesoasoani pe a oo i faalavelave faalenatura. O tatou faiga faapaaga nei i lalo o le Faavae fuaiupu 13, lea e open. O lea ua saunoa mai le sui usufono o lea e open uma i lalo o le Faavae, ua lea ona open ma e tumau pea le agai i luma aua o i ina e ala mai ai le manuia ma le tulaga i le faiga o pisinisi ma fefaatauaiga faava o Malo ma tulaga uma faapena. O le tulaga lena lau Afioga i le Fofoga Fetalai e fia faasao ai lea vaega.

FOFOGA FETALAI: Tulai mai le sui usufono e faaauau le saunoaga.

Tofa LEVAOPOLO TALATONU: Faafetai i lau Afioga i le Fofoga Fetalai. O le aoga lea o le faamanatu atu i a outou Afioga o le tulaga i le Tulafono Tau Faaofi ma faamalalama mai se mea. Ona pau lava le eseese lea ou te tilotilo i ai i le Investment Bill ma le Citizenship Investment Bill, o le eseese o le taumafai e faatosina i le faatauina o le sitiseni. O le aoga ma le autu o mea ia e lua e tutusa lelei lava, e leai lava ma se eseese. O le tauloto foi lea a le Sui Palemia sa fai mai o le Yazaki, ana leai le Tulafono Tau Faaofi lea e le oo mai le Yazaki.

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le faatauina ni sitiseni. Ona pau lava le mea o lou sau o oe e faatino au pisinisi, aua o le tele lava o i latou e ova mamao atu agavaa. E le o i ai se faaupuga e faatau – se i e saili mai lava i ina poo i ai se upu e tasi, sina upu lava e tasi o i ai i le Tulafono Tau Faaofi? Ia faitau mai po o i ai se upu e faatau le sitiseni? E leaga o le mea lea, o le mea e eleelea, o lena e tumu i le alualua mafaufauga. Se i e tago lava e faitau mai po o i ai se upu o faapea mai e “faatau le sitiseni”?

Tofa LEVAOPOLO TALATONU: Lau Afioga i le Fofoga Fetalai, e leai lava se isi mea o tau faatosina mai, o le tupe lea e tau faatosina mai e aumai i totonu o le atunuu. E le o avea i se isi atunuu le tupe lea e tau faatosina mai, o le a ou le oo i ai leaga o lo o faafofoga mai le atunuu i le uiga.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le upu lea na saunoa i ai le sui usufono o le faatau. Aumai po o fea o totonu o le Tulafono Tau Faaofi o taua ai le upu lena, leaga e tele lava accommodations, e tele lava uiga eleelea e aumai e le upu lena, afai o i ai ia faitau mai la?

Tofa LEVAOPOLO TALATONU: Lau Afioga i le Fofoga Fetalai, o le tauloto foi lea sa matou faalogo i ai i le mea lea o le.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o le mea e fia faasao. O lea sa

saunoa le sui usufono o le faatau o sitiseni. O i ai se upu faapena o i ai i totonu? Na o lou fai mai lava ioe pe leai.

FOFOGA FETALAI: Ia saunoa mai le sui usufono ma tali mai i le fesili a le Palemia.

Tofa LEVAOPOLO TALATONU: A o le a le isi mea o lea e i ai, ae faapefea ona maua le sitiseni pe a leai se tupe?

Susuga Hon Tuilaepa Fatialofa Lupesoliai Aiono Neioti Sailele Malielegaoui: Ia se i faitau mai la? Faitau mai le upu faatau.

Tofa LEVAOPOLO TALATONU: E tutusa upu na o le aumai i totonu o le.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le upu lea e faaaoaga o le teu faafaigaluegaina.

Tofa LEVAOPOLO TALATONU: E le o avea i se isi atunuu tupe nei.

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le upu teu faafaigaluegaina, e ese mamao lava ma le faatau. O le teu faafaigaluegaina o le pisinisi e fai ma faaauau ma o le uiga lena. A o le mea e faatau na ona faatau motu lava, uma. O lea matou te iloa lelei lava mea na e te agai mai ai ona o uiga alualua, uiga eleelea ma palapala.

Afioga Hon Palusalua Faapo II: Lau Afioga i le Fofoga Fetalai, faamolemole lava leaga e matuia tuuaiiga ia. E teu faafaigaluega, ae avatu lou sitiseni. O le a la le uiga o le mea lena? Faatau, ana faapea e teu faafaigaluega ae leai se mea e avea i ai, ona sao lea o lau saunoaga.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o lea ou te agai i o. O le a tauau ina soli le.... E te le faasoina lau faasao, o lea ou te faasaoa o.

FOFOGA FETALAI: Tulai mai le sui usufono, se i avatu le upu lea a le Fofoga Fetalai, se i tau ama leaga o lea e maitau uma le Maota i tuleiga ma saunoaga. Ia faamanino le tauina o upu aemaise o le tau faamatalatalaina o lou finagalo. O le ala foi lena o le taumafai e tulai atu le Malo e fesiligia leaga o lea ua tatou agai i le upu i le upu. O lea foi e taumafai atu le Malo e tuufesili po o le a le uiga tonu o le Tulafono leaga o latou e ana le Tulafono. O le ala foi lea o le tulituliloa atu po o i ai upu ia i totonu o le Tulafono Tau Faaofi, a o lea ua faamalamalama atu e le Malo e leai se mea faapena o taua ai se upu faapea faatau. O le finagalo lava lena o le sui usufono ma lana faauigaina, a o le faauigaina e le Malo o le mea lena e tauave i le tulaga aloaia.

Tulai mai le sui usufono.

Tofa LEVAOPOLO TALATONU: Faafetai i lau Afioga i le Fofoga Fetalai. O lea lava ou te tulituliloaina atu Tulafono Tau Faaofi nei e lua. E ala ona ou fai atu lau Afioga i le Fofoga Fetalai, ona o le mea foi lea sa faamatala mai ai le Tulafono muamua o le Investment Bill. Ia silasila Samoa i le Yazaki, ana leai le Tulafono Tau Faaofi lea e leai se Yazaki, leai le Vailima, a o lea foi e toe fai i le Tulafono Tau Faaofi lenei. Ua 20+ tausaga o fai lava le Yazaki, ae ana i ai se Yazoko po o se Yazaka poo se isi kamupani, ua matou talitonu i le Tulafono Tau Faaofi lenei tou te aumaia ma talitonu i le aoga.

O le isi mea lau Afioga i le Fofoga Fetalai, o le polokalame foi lenei o lea ou te talitonu ua ova ma le luasefulu atunuu o latou faia lenei polokalame. O lea na saunoa le Sui Palemia i lana Komiti o lauia uma. O lau fesili atu lau Afioga, sa agai lau au lauia e aoga i atunuu nei e i ai Panama, Brazil ma Roma i o i le Caribbean? Na o e aoga mai ai ina ia latou malamalama lelei i le mea lea? O le tali e leai, o lona uiga ou te le talitonu.....

FOFOGA FETALAI: Malie le usufono se i avatu le avanoa leaga o lea ua e taua le saunoaga a le Sui Palemia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, e leai se mea e tau o ai fua e taamilo i atunuu o le lalolagi lea e fai ai polokalame faapea. O aso nei o lea ua faaoga tekonoosi, na o le omiomi lava o le computer sau i luga le faamau ma vaai i mea ia e faasalalau. Ua fai uma lava polokalame a atunuu o le lalolagi, o le faigofie ia.

Na ou alu atu au ia anapo ina ua uma atu le Fono, ou alu atu omiomi lau computer ae oso mai le polokalame fou lea a Ausetalia, o le mea lava e tasi. Fai mai le polokalame a Ausetalia, e amata lau tupe faafaigaluega po o lau tupe faavae i le \$15miliona, a o Ausetalia o le atunuu tele e malosi le tamaoiga e lavea i atunuu foi ia e 20 o le lalolagi e matua malolosia tamaoiga. Ia, e 12 masina ua maua lou sitiseni Ausetalia.

Se i silasila la i ai i mea ia? Ou te le tau alu la i se vaalele i Ausetalia. Se i uma le Fono ona avatu lea o pepa ia e te faitau ai, ae ou te le i alu i Ausetalia e suesue mai mea ia. A lea e maua lava i inei?

FOFOGA FETALAI: Tulai mai le sui usufono e faaauau le saunoaga.

Tofa LEVAOPOLO TALATONU: Lau Afioga i le Fofoga Fetalai, o le mea tonu lava lea na ou popole ai. O lea la faatoa matou malamalama nei, e le o aumaia i sou talitonuga le Tulafono Tau Faaofi lea e te aumai. O le upu a le Tusi Paia, Right believing provides the right living, a? O le mea lena ou te fai atu ai, leaga o lena e te masalosalo i au mea na e fai mai, leaga e tasi lava lau pupula atu e te fefe, o lena e fefe lou aumaiga e te masalosalo.

FOFOGA FETALAI: Malie le sui usufono se i tuu atu le avanoa i le Sui Palemia.

Tofa Hon Fonotoe Nuafesili Pierre Laufo: E matua leai ma se masalosalo.

Lau Afioga i le Fofoga Fetalai, o le mea e fia faasao, e leai ma se fefe. A lea e avatu e le Malo le mataupu? O lea na faamamafa i le saunoaga a le Palemia. Ona pau lava le leo lea e maua i saunoaga tetee ia e aumai, o le fefe, fefe e fai

ni atinae e manuia ai le atunuu e maua ai galuega, faatosina mai pisinisi e maua ai galuega a nai a tatou fanau mo le agai i luma. O mea ia sa fau foi e isi toa manumanu o le atunuu, o outou tuua ma o tatou matua sa saofafai i nofoa nei ma fau Tulafono e manuia ai le atunuu i le agai i luma lea ua tatou aea ai mo le agai i luma. O lea foi la tatou te galulue tatou e faataotooto ma faataatitia Tulafono aua foi le agai i luma o tupulaga fai mai.

O le tulaga lea lau Afioga i le Fofoga Fetalai.

FOFOGA FETALAI: Ua lamalama faaiiu le taimi o le sui usufono, ua toe lua ou minute.

Tofa LEVAOPOLO TALATONU: Lau Afioga i le Fofoga Fetalai, soia e te alu i mea na o facebook aua e sese uma faamatalaga na e te alu aumai ai mea ia. Aumai i lou talitonuga. O le mea lena sa ou faapea e.....

Tofa Hon Fonotoe Nuafesili Pierre Laufo: Lau Afioga i le Fofoga Fetalai...

Tofa LEVAOPOLO TALATONU: O lea sa ou faapea o le musumusuga a le Agaga Paia lea...

Tofa Hon Fonotoe Nuafesili Pierre Laufo: Lau Afioga i le Fofoga Fetalai, o le Tulafono Tau Faaofi lea, o le musumusuga a le Agaga Paia lea na fai ai. Ioe, o le musumusuga a le Agaga. E le faapea e te i te i oo mai le Tulafono Tau Faaofi i luma i i. Ma le isi mea, e le o ni facebook mea ia. Soia e te faitau facebook. O mea ia o website a le Malo o Ausetalia lea e maua ai mea ia, e le o ni facebook e alu ai tala foi nei o i ma o. Lau Afioga, o lena e te masani lava e te talatalanoa i facebook. O matou e le maumuina o matou taimi i nisi mea. E le maimuina o matou taimi i ni facebook, na o mea sutesue e fai ai research, ae le o talanoa faitatala i ni facebook.

FOFOGA FETALAI: Malo. Tulai mai le sui usufono mamalu.

Tofa LEVAOPOLO TALATONU: Malo faafetai. Lau Afioga i le Fofoga Fetalai, o le isi vaega lea e tatau ona ou faamanatu atu, o le mea lea sa e talanoa ai foi ia saogalemu le atunuu i tagata faimai. Na pau le mea ou te faamanatu atu, o le mea lea o le tagata faatupu faalavelave o le terrorists, e le o ni milionea tagata, they are billionaires, trillionaires. E le feoi ma ni auupega foi ia, vaai foi i le toaina foi lea e nofonono mai lava i o ae pay tagata e faatino le mea lea.

FOFOGA FETALAI: Malie le sui usufono se i tulai atu le Afioga i le Sui Palemia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, o le mea e fia fasao ma faamanatu. A lea e silafia lelei lava e Palusalua le tatou Tulafono lea na tatou luga lalo ai, le Terrorist Bill, o lea e i ai le tatou Terrorist Bill e taofi ai tagata na. A lea na tatou finau ai foi i tai i Mulinu i totonu o le Maota lena i le Terrorist Bill? O le tausaga ea lea na

tea nei. O lea e taoto mea uma na, o lea e malupuipua le atunuu. Ou te le iloa po o le a le mea e... se e atagia lava i au saunoaga o lena e te fefe.

FOFOGA FETALAI: Malie lau Afioga i le Taitai o le Itu Agai...

Afioga Hon Palusalue Faapo II: O le mea lea e fia faasao...

FOFOGA FETALAI: Palusalue, malie o lea ou te faasaosao atua le tatou Fono.

Afioga Hon Palusalue Faapo II: O le terorisi, e le faia e ni tagata milionea.

FOFOGA FETALAI: Palu, malie o lea e tau faafoefoe le tatou Fono. Ua tatou taunuu i le tatou taimi malolo, ua ou manatu ua tatau ona fai se inugati ua sau foi le faanenefu o le taeao.

O le a faataatia ese Tausalumaga a le Fono Aoa mo lana malologa masani o le taeao.

Na faataatia ese Tausalumaga a le Fono Aoa mo lana malologa masani i le itula e 10:45 i le taeao ma toe faaauau i le itula e 11:21 i le taeao.

FOFOGA FETALAI: Ou te faasilasila atu ua toe amatalia nei Tausalumaga a le Fono Aoa Faitulafono. Faafetai foi o lea ua maua ua toe malosi le siufofoga o le Agai o le tatou Fono. E faamalo atu i le mamalu o le tatou Palemene i lenei foi itula o le aso, e manatu o lea ua tatou taunuu i le vaega lona lua o le faasologa o tuleiga ma saunoaga aua le faataatiaina o le tatou polokalame pei ona faatulagaina. E momoli atu le faafetai tele mai le taeao analeila. E i ai le agaga maualuga ua faafoisia lo outou malosi i le tino, aua o le mea sili lena e muamua ma tatau ona fai e tatau ona faaatoatoa lo outou malosi e mafai ona faaauauina le galuega.

E faia le tatou malologa ua faaiuiu mai le saunoaga a le sui usufono mo Gagaemauga Nu.3. Tuu atu ia le avanoa lenei e tulai mai ai Levaopolo e faaiu mai le saunoaga.

Tofa LEVAOPOLO TALATONU: Faafetai i lau Afioga i le Fofoga Fetalai. E leai toe lua lava nai mea puupuu ia e i ai. Na o ni nai manatu e faatupu manatu lau Afioga agai i le Malo, e faufau ai so latou finagalo.

O le isi vaega lau Afioga i le Fofoga Fetalai, o le eseesega o siosiomaga lau Afioga. E talitonu le taofi, so o se Tulafono lava e fau e fua i le siosiomaga o se atunuu. E tofu lava le atunuu latou ma latou tu ma aga faapea foi o latou talitonuga i tapuaiga. O le upu moni lava lau Afioga i le Fofoga Fetalai, tasi lea o auupega matautia i le tulaga lava ia o le fegasoloai o tagata mai lea atunuu i lea atunuu. aua a oo loa ina lolofi mai aiga o nisi o ni investors i totonu o Samoa, ona tatou faalogologo loa lea e faa-Alapi ane le isi aiga, faa-Saina ane le isi aiga, faa-Toga ane le isi aiga ma mea faapena, aua e nanau lava le tamaloa po o le fafine ia, aoa lana fanau i le latou gagana. O le

popolega la ia te au, e ono tafea le gagana a le tatou atunuu. O le tasi lena o vaega na ona faamanatu atu lava ina ia silasila totoa i ai le tatou....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga fetalai, e ao ona ou faasaoa le faasese lea na fai mai nei, o lea ua uma ona pasi le tatou Komisi o le Gagana, o le Komisi la lena o le Gagana Samoa, o lena e i ai i totonu aiaiga mo le puipuia o le tatou gagana ina ia sao. O le a tatou tufue lava agai i tagata nei o lea lava ua oo i a tatou fanau ua amata ona le toe fia faa-Samoa nisi, ae ua amata ona tatou oo i mea tatou te le iloa, aua o le mea nei na ona fai o tatou Tulafono ona tatou nofonofo lea ma taputapu ai po o ai e omai. E pei lava ona ou fai atu i le lima sefulu tausaga ua uma atu, na o le tolu lava mea tetele lea ua tupu. E le iloa pe oo atu i le isi 50 tausaga ua maua se isi sefulu mea tetele pei o le Yazaki ona faapefea lea? Lau Afioga i le Fofoga Fetalai, e leai lava ni mea na tutupu, aua o iuleo foi nei, a tumutumu mai nei tagata mai fafo, talofa i le tatou aganuu o le a soloia, aemaise lava pea tumutumu mai nei tagata asiasi maimoa mai. Ia e le o tele lava ni tagata asiasi maimoa mai, o lea lava e tuputupu malie ae lea faatoa 135,000 o le taumafaiga mai le 50 tausaga talu ai. A toe alu nei la le isi 50 ae toe faapopo mai se isi 100,000, ahh, ua tatau ona tatou pese aleluia.

Lau Afioga i le Fofoga Fetalai, o le mea lena ua ou tulai atu ai e tau faasaoa le sui usufono. O le a tufue lava tatou popole i na mea a o tatou fanau lea ua toatele ua oo lava i le tautala mai luga o le TV ma le 2AP ua ese la faaleoga o upu e sau ai. O le ala lena o lea ua uma ona laa i ai le tatou Malo i le puipuiga o lena foi tulaga.

FOFOGA FETALAI: Faaiu maia le saunoaga le sui usufono mamalu Levaopolo ua maea lou taimi.

Tofa LEVAOPOLO TALATONU: Lau Afioga i le Fofoga Fetalai, e usitaia lava lau Afioga. Toe pau lava lea o se mea e avatu ai foi se tuualalo. O le polokalame lena, ua 2,000 tausaga talu ai talu ona amata mai, ma e pei lava ona ou fai atu e i ai atunuu e successful le latou faatinoga o le polokalame, e i ai foi atunuu o lo o feagai ma faafitauli. Tasi lea vaega e avatu ai se fautuaga i lau Afioga i le Sui Palemia e silasila totoa i le vaega lea ona o aafiaga. Silasila, o atunuu uma lava ia, o le faafitauli aupito sili lava la e tulai mai ai, o le aafiaga o le polokiki. Ua toe vaemania lava le tulaga o a latou polokalame....

Tofa Hon Fonotoe Nuafesili Pierre Laufo: Lau Afioga i le Fofoga Fetalai o se mea e fia malamalama i le saunoaga a le sui usufono. E faafesili atu lava po o ai le Faigamalo lea na faia le polokalame lea i le 2,000 tausaga talu ai. O ai le faigamalo lena?

FOFOGA FETALAI: Tulai mai le sui usufono.

Tofa LEVAOPOLO TALATONU: Se i silasila la i ai i le le malamalama. Na amata mai le Malo o Roma i le 2000 tausaga talu ai le mataupu lea, sosoo mai ai Brazil, Panama, amata mai le Caribbean nations, vaai i le tele o le mea e le i oo i ai lau suesuega i le mea lena.

Lau Afioga i le Fofoga Fetalai....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Ia sei vaai lava i le sese tele? O le matua sese i Sini o nei manatu e aumai. O lea e talanoa mai ia Roma. E le faapea na tatalo Roma i nisi e o atu e fai ni a latou pisinisi i Roma. Sa faaaoga le pelu a? Sa faaaoga le pelu. O lea e tau atu ia te oe, leaga e te matua le iloa se mea tau Roma. E matua e le iloa se mea tau Roma, ae sa faaaoga lava le mea o le pelu ma le tao. Ae manatua foi la, sa faapena foi le tupu o Tavita, sa faapena. O le taimi lena e fua i le malosi o le tao ma le pelu. E le o i ai ni mea faapena i le taimi lenei. O le taimi lenei, o le taimi o le faatemokarasi, e le o le taimi o le pelu ma le tao. O lena la e tau atu ai faapena, ona e sese tele lava le mea lea e te agai mai ai.

Tofa LEVAOPOLO TALATONU: Lau Afioga i le Fofoga Fetalai, o lena ua sao tonu lava le mea lena, sa faaaoga le pelu. O le investment sa fai i totonu o le malo o Roma i le taimi lena, o le sports, o le sports lea sa fai i totonu o le arena e invest ai tagata la e omai ma pelu, ae na alu alu lava iu ina faaletonu, ae sa successful lava le Malo o Roma....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o lena foi ua toe sese. E le o ni tupe a nisi e avatu i fafo, o mea lava a le Malo o Roma latou, o mea lava e nonofo le Malo o Roma ma fau, ae le o ni tagata na o atu i fafo. Se i vaai i ai i le.... Aua e te aumaia ni mea sese e faasese ai le Palemene lenei.

FOFOGA FETALAI: Ia, faaiu maia Levao ua faalua lea ona ou taumafai atu, ua manino ma malamalama au fautuaga, o lea ua oo i le Malo ma le Sui Palemia.

Tofa LEVAOPOLO TALATONU: Faafetai. E usitaia lava le faatonuga a lau Afioga i le Fofoga Fetalai, ae maumau e pe ana lava se taimi, e tele lava nai fautuaga i mea la e tau faaletonu mai i le aumaiga o le faamalamalama. Na pau lava lea o le Tulafono ua faalua ona faamalamalama. O le mea lena e iloa ai le maaleale o le Tulafono Tau Faaofi ma e ao ona tatou veloaso i ai i le tulaga lea ma le Tulafono Tau Faaofi. Ae faafetai tele lava i lau Afioga i le Fofoga Fetalai mo le avanoa.

FOFOGA FETALAI: Maua le avanoa, o lea e i ai le tulaga faa-Komiti, tatou taunuu mai tatou toe o i le iloiloga auiliili. Malie le Alataua se i tuu atu muamua le avanoa i le Afioga i le Minisita. Se i tulai mai lau Afioga Magele, le Minisita mo Aoga, Taaloga ma Aganuu.

Afioga Hon MAGELE MAULIU (Faasaleleaga Nu.1): Lau Afioga i le Fofoga Fetalai, e faatalofa atu i lau Afioga i lenei taeao, e faatalofa atu foi i le Afioga i le Palemia Sui Palemia ma le Aiga Kapeneta. E faatalofa atu foi i le Taitai ma le Sui Taitai o le la Itu ma sui usufono mamalu uma o le Maota Fono.

Ou te tulai atu ma le faaalalo e fai foi sina manatu i le Tulafono Tau Faaofi ua i lumamea nei. Sa.....

Afioga Hon Palusalue Faapo II: Lau Afioga i le Fofoga Fetalai, o se mea e fia faamalamalama.

FOFOGA FETALAI: O le a le mea e fia faamalamalama?

Afioga Hon Palusalue Faapo II: O le Tulafono Tau Faaofi leni, o le Tulafono Tau Faaofi a le Kapeneta. O se saunoaga faa-Minisita foi pe leai?

FOFOGA FETALAI: Ia o lea o le a ou faamalamalamaina atu. E leai, o le tulaga o la e fai le finagalo o le sui usufono i le tulaga lautele. Silafia foi leaga o lea na pai uma le faamalamalama a le Malo i tulaga tau falemai, siosiomaga, o aoga. Masalo la o se mea tau aoga lea e tulai mai ai le Afioga i le Minisita.

Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, talu lava ona ou tulai mai i le Palemene, e i ai taimi e alu lava a oo loa ina ogaoga se mataupu, e tatala lava le avanoa i Afioga i Minisita e lauga ai faafaipule o latou itumalo. O le tulaga la lona atonu foi e i ai se mataupu Faaminisita o lea e fia agai i ai, ae e le faapea o tamau le mea lona i le tatou Tulafono e faapea a e Minisita, e le mafai ona e lauga faafaipule o le itumalo.

FOFOGA FETALAI: Tulai mai lau Afioga i le Minisita.

Afioga Hon MAGELE MAULIU: Sa faalogo lava ma le totoa i le saunoaga a le Afioga i le Palemia faapea foi le Sui Palemia i le Tulafono Tau Faaofi leni. O le aoga o aute o le Tulafono Tau Faaofi leni, o galuega ma e tele lava sootaga i le aoaoina ma galuega. O i ina la lea e i ai lou manatu e tatau ona alu tonu i ai le finauga, o galuega, a o lea e pei ua alu le taimi o tatou finau i le Tulafono Tau Faaofi i mea ia o sitiseni, a o lea lava e mafai ona control, o lea ua i ai le Tulafono. A o le toatele o tagata o le atunuu e aofia ai Savaii ma Upolu nei, e le o interest lava latou i lea mea o le sitiseni. Ona pau lava le naunautaiga o tagata, ia maua ni galuega, ia maua ni meaai i luga o le laulau, food on the table, ia maua ni seleni e fai ai mea faale-Ekalesia, ia maua seleni e fai ai mea faalenuu, ia maua seleni e ave ai tamaiti i le aoga. O le naunautaiga lona o galuega a alo ma fanau e tua i ai aiga, nuu ma Ekalesia.

I se talanoaga ma lou nuu ma le itumalo, po o nisi foi o le itumalo o Faasaleleaga atoa, fai mai i latou, o afea ea e oo mai ai ni atinae tetele i totonu o Salafai se i maua ai ni galuega? Lau Afioga i le Fofoga Fetalai, i le tusigaigoa a le lautele o le atunuu lea na mavae atu nei, o lo o faaalua ai e faapea, e 2,500 tamaiti, o tama ma teine talavou e i le va o le 16 i le 29 tausaga e le o faigaluega. O i latou ia ua faaigoaina i le tusigaigoa o out of school youths. Mai le 2,500 lea, e ova atu i le 50% e nonofo i le itumalo o Faasaleleaga. O le taua lea, e le o se manao faivavale la po o se manao na ona fai ane ai le manao o lea foi itumalo aemaise foi o Salafai. Ua ova ma le 50% e out of school youths o lea e i ina i le Faasaleleaga. O le isi vaega toatele o i latou ia ua faaigoaina o out of school youths, lea e i le itumalo o Vaimauga Sisifo, lea sa lauga ai le sui usufono mamalu o le itumalo o Vaimauga Sisifo i

le Fonotaga a le Palemene 2013 e faapea ua tumu lona itumalo i tamaiti e le o faigaluega ma e le aoga foi. Ou te talitonu o le tausaga lenei ua sili atu i le 3,000 le aofai o i latou nei ona o lo o maitauina pea e le Matagaluega, o lo o toatele pea tamaiti e faamaamulu mai i le tausaga aoga 11 ma le 12.

Tofa Aveau Tuala Lepale Niko Palamo (Faleata Sasae): Lau Afioga i le Fofoga Fetalai, o le mea e fia faamalamalama.

FOFOGA FETALAI: Malie lau Afioga i le Minisita. O le a le mea e fia faamalamalama Aveau?

Tofa Aveau Tuala Lepale Niko Palamo: Na ona ou faafesili atu lava i le Afioga i le Minisita, po o ai la e tuuai i ai le mea lea e lauga ai?

FOFOGA FETALAI: O lea ua manino ma malamalama, o le Afioga i le Minisita o lea e fai lana folasaga faafaipule i lona tulaga i lona itumalo ma le aafia o lona itumalo i le tulaga lea, a o le a maea ona aumai lea o lau o le saunoaga a le Minisita.

Tulai mai lau Afioga i le Minisita.

Afioga Hon MAGELE MAULIU: Lau Afioga i le Fofoga Fetalai, o le isi vaega ua faatupulaia le le maua o ni galuega o i latou ia ua iu mai le tatou Iunivesite i le fuaifale o le potu salalau o le Iunivesite.

I le lima tausaga e oo mai i le 2014, o le evaresi o tamaiti e iu mai ua faamanuiaina, e 2,605 i le fuaifale o Matata Eseeese a le Iunivesite, o le evaresi o tamaiti e iu mai i le lima tausaga e oo mai i le 2014, e 350. O lona uiga e 650 i latou e iu mai i le tatou Iunivesite i tausaga taitasi ma o lo o sue galuega.

O le tausaga nei 2015, e ova i le 1,000+ tamaiti na ofi atu i le tausaga faavae o le Iunivesite. O lona uiga o se faasiliga e 100% mai le tausaga e 2014. O lona uiga e oo atu i le tausaga e 2018 i le isi tolu i le fa tausaga, ua oo le numera o e faauuina mai i le tatou Iunivesite i se fuainumera e sili atu i le 1,200+ tamaiti e iu mai i tausaga taitasi. O se fuainumera tele lea mo si o tatou atunuu laitiiti. Ae peitai.....

Afioga Hon Palusalua Faapo II: Lau Afioga i le Fofoga Fetalai, o se mea e fia faamalamalama.

FOFOGA FETALAI: Malie le sui usufono lau Afioga i le Minisita, se i tuu atu le avanoa i le Taitai o le Itu Agai.

Afioga Hon Palusalua Faapo II: Leaga o le excuse lava lea ua aumai o tamaiti e leai ni galuega, a o lea e le lava au faiaoga, o la e le lava au fomai. O le a le mea e le faia ai ni faiga faavae ina ia faaoga tamaiti ia, ia aoao lelei? E matua lava lelei pe a faaoga tamaiti ia.

FOFOGA FETALAI: O lea ua maua lou finagalo le Taitai o le Itu Agai, o lea ua maua lou finagalo faaalua. Malie lava e pei o le agaga lena o lea e tau avatu i le faamalamalama, o le saunoaga la e saunoa mai ai le Afioga i le Minisita, o lo o saunoa i tulaga o lo o aafia tele ai lona itumalo.

Se i tulai mai lau Afioga i le Minisita.

Afioga Hon MAGELE MAULIU: Lau Afioga i le Fofoga Fetalai, e pei e sili lava le lava mai pea o le faafofoga se i oo i le iuga, ona outou iloa lea ma outou silafia le mea lea e agai i ai le tautalaga.

Ae peitai, o le fuainumera lea na ou avatua e 1,200 mai le tatou Iunivesite, e le o aofia ai i latou nei mai isi aoga e pei o Don Bosco, Tesese Institute, Punaoa Technical Centre, Wesley and Technical School ma isi aoga. Ou te le i maua le fuainumera o i latou nei, ae e talitonu e feoloolo foi le fuainumera o i latou nei ua iu mai. A faaopoopo la i ai i latou nei o e ua iu mai i le tatou Iunivesite ma out of school youths, o lona uiga ua tulai mai ai se luitau ogaoga lea o le a tatou feagai agai atu i le lumanai.

E i ai foi alo ma fanau ua iu mai i Iunivesite i fafo e pei o le USP, Iunivesite i Niu Sila, Ausetalia, Iapani ma Saina, e sue galuega foi pe a iu mai. Lau Afioga i le Fofoga Fetalai, o le ogaoga lea o le luitau o lo o feagai nei ma le tatou Malo. E ao ai ona saili auala e maua ai galuega. O le faaauau pea ona faamalosi sootaga i eleele, sootaga i matai ma aiga, sootaga faakerisiano i si o tatou atunuu, e pei ona saunoa i ai se tasi o sui faipule o Vaimauga Sisifo - ou te faafetai i lou uso faipule i le lauga matagofie aua ua ia faasaoa mai i le sese sa ia te au. O le sese lea sa ia te au ua leva ona ou nofo ma au, faapea lava au ia o Susuga i Loia e leai ni o latou lagona, lagona foi ia e alolofa ma loto nutimomoia, a o lea ua faasao mai au e le uso lea. O au toetiiti lava a ou tagi ma maligi ou loimata i le lauga faamomoloto lea. O lea ou te faamalo atu ai ma ou faafetai i le sui usufono.

O le faamalosi o fesootaiga ma le faasinomaga o le Samoa e pei ona saunoa i ai, e talitonu lou manatu faasui usufono, ona pau lava lea o le auala e taofi ai ina ia mausali ma taofi le lepetia o le aoaoina lelei ma maua galuega lelei a alo ma fanau o Samoa, aua foi o le aoaoina ma le faigaluega e empower ai le tama ma le teine e siitia ai lona status, e empower ai o ia i totonu o le va ma le nuu, aiga, Ekalesia ma le va ma isi tagata. A oo ina tatou empower ina le tama ma le teine i le aoaoina ma maua galuega, e amanaia lona leo i totonu o lona aiga ma lona nuu. E faigata foi i lea tagata ona talepe le saofaiga ma le filemu o lona aiga i mataupu tau eleele ma suafa matai, aemaise o le taimua i totonu o Ekalesia, autalavau, aufaipese ma isi tulaga faapena. E maua ai le filemu o nuu ma afioaga, e maua ai e matua le faaeaina ona ua faigaluega se tasi po o se toalua o le fanau, ua faaee i ai suafa matai ona o le amanaia e le aiga ma le nuu o lona tulaga. O se tagatanuu lelei, ua aoaoina ma faigaluega.

Lau Afioga i le Fofoga Fetalai, fai mai le muagagana faa-Saina, "A e fuafua mo le tausaga e tasi, toto le alaisa, a e fuafua mo tausaga e sefulu, toto laau, ae a e fuafua mo le olaga atoa toto tagata". Lau Afioga i le Fofoga Fetalai, o le miti lona a le Faigamalo ma le Palemene i lona vaitaimi. O ai e galo le amataga o le tatou Iunivesite? O lea foi sa vevesi ai le Maota. Na faatoa 5 tausaga a o ou faigaluega ae ou faalogo mai i le vevesi o le Maota o le a faatu le Iunivesite a Samoa i le \$5.00. O lea e silafia lelei e le Palemia. O le 1984 amata le tatou Iunivesite i Malifa. O le 1997 see atu i Toomatagi i lona nofoaga o i ai nei. O le 1993 siitia le Matata Eseese e avea ma Polytecnic. O le 2006 tuufaatasi le Iunivesite ma le Polytecnic. O aoga nei e lua a lo tatou Malo sa fesoasoani malosi i le atinaega o si o tatou atunuu faatasi ai ma a tatou paaga mai fafo, aemaise foi o fanau ua iu mai i Iunivesite i fafo. O lea ua tatou oo i se laasaga fou.

O lea ua tatou oo i le tulaga ua leva ona faafeagai ma isi atunuu o le lalolagi. O lea ua popoto ma atamamai fanau a Samoa e toatele, ae ua fai sina utiuti o galuega. Ua taunuu le miti, a o le lui mo le Malo ma tatou uma lava, o le taumafai lea e fai auala e maua ai galuega. E ao la ona tatou celebrate, tatou patipatia le taeao lenei, o le taeao o le tulaga maualuga o aoaoga a alo ma fanau a Samoa. O galuega a oe ma au, o la e faafogafoga mai ma silasila mai alo ma fanau, o outou alo ma fanau i a tatou mea ia e fai. O tamaiti aoga ia o le NUS sa tumu ai iinei, na o sina vaega toaititi lava, a o le toatele o le fanau lea e i le top twenty, o faiai aupito maai na i totonu o le atunuu. O latou ia na ausia togi maualuluga. O lona uiga, o le latou omai ma silasila ma vaavaai i aga ma tu Faapalemene, o la e vaai ma filter, o a ni mea e lelei ai mo matou, latou te iloa lelei lava mo talanoaga e leai se fua e maua ai. O se Tulafono e ao ona tatou celebrate, tatou patipatia ma tatou fiafia i ai, aua o le Tulafono o galuega a ni o outou alo ma ni a matou fanau.

Lau Afioga i le Fofoga Fetalai, i le sailiiliga o ni finagalo o tagata Niu Sila na fai e le New Zealand Roy Morgan Fowl ia Aokuso 2014 ae toe tolu lava vaiaso fai le palota tele a Niu Sila, sa fesiligia ai tagata po o le a le faafitauli aupito sili ona ogaoga o lo o feagai ma tagata Niu Sila. E 41% o tagata Niu Sila na latou faaalua, o le tamaoaiga i le le lava o le faasoa ona o le leai o ni galuega. O le faafitauli aupito ogaoga lea i Niu Sila, e 41% o se numera tele mo lea foi atunuu.

Lau Afioga i le Fofoga Fetalai, ou te fia faaiu atu i upu ia mai le saunoaga a le Taitai o le Itu Agai a Niu Sila, Andrew Little. Na saunoa le Taitai o le Itu Agai a Niu Sila i le taua o le faatupuina o galuega mo tagata Niu Sila i lana state of the Nations Speech i le aso 28 Ianuari 2015, “I quote, as a Party to make it to creating good jobs for New Zealanders, we know that many of the jobs we want to create, will come from business. This is the only way to drive down unemployment.”

Lau Afioga ua ou aumaia upu ia ona o le lauga atoa a le itu lea a le Taitai o le Itu Agai, leai ma se mea na faaleagaina ai le Malo, o le mea lea e ofo ai tagata Niu Sila ma na ala ai ona rate the speech lea, o se Speech aupito sili ona taua i Niu Sila, leai ma se faaleagaina o le Malo, e focus lava le Speech lea, Job Creation, pisinisi mai totonu pisinisi mai fafo.

Lau Afioga i le Taitai o le Itu Agai.....

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Malie o lea o le a faauma mai le saunoaga ona.....

Afioga Hon Palusalua Faapo II: Leai meamanu se i fai sau faamatalaga i le mea lea.

FOFOGA FETALAI: O lea o le a faaiu mai le saunoaga a.....

Afioga Hon Palusalua Faapo II: Leaga e faauigalua le saunoaga.

FOFOGA FETALAI: E leai se faauigalua o la e aumai mau a le.....

Afioga Hon Palusalua Faapo II: Ma e eseese lava Niu Sila ma Samoa.

FOFOGA FETALAI: Malie lau Afioga i le Taitai o le Itu Agai.

Afioga Hon Palusalue Faapo II: E le.....

FOFOGA FETALAI: Malie o lea o le a faauma mai ona avatu foi lea o le avanoa, vaai o lea e le i avatu lou taimi atoa e te saunoa ai i le Tulafono, o lea e saunoa lau Afioga i le.....

Afioga Hon MAGELE MAULIU: Lau Afioga i le Fofoga Fetalai, taitai e ui ina agai ae sao lona loto i le mea e manuia ai tagata. O le a ou aumaia lau Afioga i le Taitai o le Itu Agai ona ou te iloa lelei lau Afioga.

Afioga Hon Palusalue Faapo II: Silasila la i saunoaga ia?

FOFOGA FETALAI: O lea o le a uma ona avatu lea o le avanoa, e le i.....

Afioga Hon Palusalue Faapo II: Silasila o la ua saunoa sao mai ia au.

FOFOGA FETALAI: Ia e le o ai avea, o tau lou igoa po o la e.....

Afioga Hon Palusalue Faapo II: Lau Afioga i le Fofoga Fetalai.....

FOFOGA FETALAI: O le fautuaga la e aumai e le Afioga i le sui usufono.

Afioga Hon Palusalue Faapo II: Lauga sao faalauaitete, aua e te lauga i le tagata, vaeatu lau Afioga i le Minisita.

FOFOGA FETALAI: Ia o lea o le a faaiu mai le.....

Afioga Hon Palusalue Faapo II: E matua sese i Sini lau saunoaga.

FOFOGA FETALAI: Malie lau Afioga i le Taitai o le Itu Agai, se i fai atu pea le.....

Afioga Hon Palusalue Faapo II: Saunoa sao i le mataupu.

Afioga Hon MAGELE MAULIU: Lau Afioga i le Fofoga Fetalai, ou te malamalama lelei i le Taitai o le Itu Agai, o lou uso, na ma ifoifo faatasi mai i le toala fanau o le Aiga Malosi, o lou aumaia lea o le tala lea, aua o lea ou te iloa, e malosi le tofa lea e i ai ma le faautautaga. Sagai ane laia la outou vaega fai mai ni a outou lauga e faafiafia ai le atunuu, agai i le mea lea o le.....

Afioga Hon Palusalue Faapo II: Silasila la lau Afioga, o le a tau oo ina le mafaufau.

FOFOGA FETALAI: Ia malie.....

Afioga Hon Palusalue Faapo II: E te le faatonua lauga a le itu lenei, e te le faatonua.

FOFOGA FETALAI: Malie le saunoaga a le Taitai o le Itu Agai, o lea o le a faauma mai le.....

Afioga Hon Palusalue Faapo II: Ia sagatonu lau lauga, e sao lo ta uso, ae le faia le uso i i?

FOFOGA FETALAI: Malie lau Afioga i le Taitai o le Itu Agai, o lea o le a uma ona avatu lea o le.....

Afioga Hon Palusalue Faapo II: Ioe, ia o le a faagafua, o sui usufono mamalu o itumalo ae e te faatonu mai?

Afioga Hon MAGELE MAULIU: Ou te le o faatonu atua, o lea ou te fautua atu.

FOFOGA FETALAI: O la e sagatonu le.....aumai pea lau fautuaga a o lea o le a maea mai lau fautuaga ona avatu lea o le avanoa.

Afioga Hon Palusalue Faapo II: Matou te le manaomia lau fautuaga. Lau Afioga i le Fofoga Fetalai, e le manaomia, fautua oe i la outou vaega, aua le aoaia maia le mamalu o le Itu Agai.

FOFOGA FETALAI: Ia o lea ua maua. Malie lau Afioga i le Taitai o le Itu Agai.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai, o le Maota lenei e le o se Maota na o se Taitai o se Itu Agai. O le manaia ia o le saunoaga ona o lea matou te fia faalogologo i ai. O le tasi lea saunoaga e alu i tala faasolopito ona o se matua saunoaga taua, manino ma ou te fia faalogologo i ai leaga o mea ia e faavae ai tonu mautu ma tonu e fau ai Malo. Ou te matua faamalo i lau Afioga i le Minisita.

Afioga Hon Palusalue Faapo II: Lau Afioga i le Fofoga Fetalai o se mea e fia faamalamalama.

FOFOGA FETALAI: Ia.

Afioga Hon Palusalue Faapo II: O lea ua faaopoopo mai le tafu o le afi e le Afioga i le Palemia. A o le upu moni, ua ala ona faaletonu galuega a tamaiti ona ua 30 tausaga o i ai le HRPP, e leaga le faafoega o le atunuu, ioe, o lea ua tulai mai le faafitauli lea, o lea le tou fofu? O le faatau o Samoa. O le sao lana.

FOFOGA FETALAI: Malie lau Afioga i le Taitai o le Itu Agai. Palusalue, o la e lava e sagatonu le saunoaga a le Afioga i le Minisita. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai, na o le pau lava le mea lea ou te

faalogo ai ia Palusalue, na o le tu mai lava faaleaga lea lauga, faaleaga lea lauga, ae leai ma se fautuaga lelei ua ou faalogo i ai o aumai. Na o le alu atu lava o lea faasalalauga i luga tu mai fana i le tuitui, ae leai lava ma se mea lelei o aumai ia te oe, leai lava ma se mea lelei o aumai ia te oe, na o le pau lava lea. Ae tatalo ia sao lau lauga.

FOFOGA FETALAI: Malie le sui usufono se i tau lauama tootoo le tatou mataupu.

Afioga Hon Palusalue Faapo II: Lau Afioga o le mea e fia faasao, e le i oo i le taimi ou te pai ai i le mataupu.

FOFOGA FETALAI: A foi o le uiga lena o lea ou te taumafai atu ai. A foi lea na ala ai ona ou fai atu, tuu le avanoa se i sausaunoa. Silasila foi ua ese le alafua lea ua tatou i ai. A ou nofo nei ma ou mafaufau totoa lava i le mea lea e sau ai le saunoaga, o le tele ia o piitaga la e agai mai ai le Minisita, o piitaga faalenuu, piitaga faale-Malo, piitaga faale-itumalo, la e agai mai ai lana faapulapulaga ma lana fautuaga, e le o i ai se upu faapea ua faatonu maia le na Itu o le Maota ma lau Afioga i le Fofoga Fetalai e faapea ona fai le... O la e ua na quote ina mai le lauga a se tasi o tagata tautaua foi o le Itu Agai o le Malo o Niu Sila. Ia, o ai lava mo mataupu lea tatou te soalaupule. Ae ona o tulaga ogaoga ia ua faamalamalama mai e le Afioga i le Minisita o Aoga, o le ogaoga o fanau lea ua uma mai tausaga e leai se mea e o i ai, o lea ua ou manatu o le agaga tonu lava lea o lea ua tulai mai ai le Minisita, o le a le aafiaga o le Matagaluega o Aoga, o le mea lea e tupu i le taimi lenei, that is what is trying to prove ma aumai, a o le tulaga ia i saunoaga, ia aua le aia fua Moo i liu o vaa, e faamalulu foi i lau Afioga i le Minisita ona o lena e te agai mai ona o lea ou te iloa, e tasi le toala faaautama lea ua e tapa o lea sa oulua omai ma le Taitai o le Itu Agai, e taua foi lau fautuaga lea e aumai mo le faatonutonufolauina, ae le i saunoa, e le i oo i le taimi e saunoa ai, o le ala foi lea o lou fai atu, onosai, a oo lava i lona taimi, ia ona sasau lava lea o ia po o fea e agai i ai lana saunoaga.

Afioga Hon Palusalue Faapo II: Lau Afioga ou te faaaloalo tele i lau saunoaga, e pau lava le mea o lea ou te soso atu ai, o sui usufono o lenei itu o le Itu Agai, o le la o le a oo i ai lana fautuaga, aua le fautua fua ia, fautua i le Malo i le mea e maua ai galuega a tagata, aua e te fautua fua i lauga, o le mea lea o lea ou te tulai atu ai.

FOFOGA FETALAI: O le...Palu...

Afioga Hon Palusalue Faapo II: Agai mai pea la ia au, pe afai o au o lou uso, ae aua e te agai i le vatapuia ma sui usufono mamalu o itumalo. Ia e faaeteete i ai.

FOFOGA FETALAI: Palu afai e moni lou finagalo o le Maota lenei o le ato e fevailiai, ia e faapena le tatou tu ma le aga, o le tofa e aumai avatu, e leai ma se faaletonu o le mea lenei o le tatou agai e faapea e tau faatonu, e leai, e le o le agaga lena lea e aumai e le Afioga i le Minisita, o lo o manino lana saunoaga, ia o fautuaga mo le lelei o lena itu, o lea foi tou te fautua mai i

lea itu. Ia vaai, vaai i le matagofie, taufai fautuaa'i, ia ma faatoesea'i, ia faaleleia'i, ia se i silasila i le matagofie o le.....ae tulai mai lau Afioga i le Minisita mo Aoga, Taaloga ma Aganuu e faaauau mai le saunoaga.

Afioga Hon MAGELE MAULIU: Faafetai i lau Afioga i le Fofoga Fetalai. O la e mau lava le toovae i sui usufono, ae na o le Taitai lava lea e fai ma tu mai i luga.

Afioga Hon Palusalue Faapo II: Lau Afioga i le Fofoga Fetalai, e le mafai ona ou tuua ituaiga saunoaga ia. E ala ona olo le fua i le itu lenei, o le faaaloalo mai ia au o au e avatua le upu ia oe, o au e faasaoa oe, o le faaaloalo, leaga o le vaega lenei, e faaaloalo toe maopoopo, ioe, ae aua la e te avea sese.

FOFOGA FETALAI: Ia o lea ua maua lou finagalo.

Afioga Hon Palusalue Faapo II: Lau Afioga i le Fofoga Fetalai, e tatau ona taofi ia lauga, o lauga faauigalua e afaina ai manatu o sui usufono.

FOFOGA FETALAI: Tulai mai.

Afioga Hon MAGELE MAULIU: Lau Afioga i le Fofoga Fetalai, e te le faatonua mai, o le tele o tala e iloa ai le faavalevatea.

Afioga Hon Palusalue Faapo II: Ia se i silasila la i ai i le le mafaufau, aua e te le mafaufau, o oe na e te faavalevatea.

FOFOGA FETALAI: Ia o le mea lena na ou fai atu ai, Palu, alaala mai i lalo le sui usufono mamalu.

Afioga Hon Palusalue Faapo II: Aua le faavalevatea, e te le aoaia matou.

FOFOGA FETALAI: Alaala mai i lalo le sui usufono mamalu. O le ala lena o lou taumafai atu i le taimi ua sola.

Afioga Hon Palusalue Faapo II: Lau Afioga i le Fofoga Fetalai, o le mea lea na ou fai atu ai e le fetai lau lauga, ua uma ona aumai le mataupu i le Kapeneta, a o lea ua e toe lauga, o le faavalevatea la le mea lena.

FOFOGA FETALAI: Se aua le.....malie lau Afioga i le Taitai o le Itu Agai o lea e faatonutonu atu le tatou Fono, oomi le moli ona faatali lea se i ou fai atu ona avatu lea o le avanoa. O lea foi o le a tatou toe o i le ogasami lea sa tatou omai ai ananafi. Aua ne i toe tulai mai le tulaga lea, e le mafai e le isi sui usufono ona taofia le finagalo o le isi sui usufono, o lea foi na avatu le avanoa e faasaosao ai. A o le finagalo o le Minisita, o le finagalo lena, o lana lena lauga o lana aiatatau o lea tatou te lauga i le tulaga faalauaitete. Saunoa mai le Minisita.

Afioga Hon MAGELE MAULIU: Faafetai i lau Afioga. Ia ua oo mai lau lauga i lona iuga. Ia manuia tele lau Afioga i le Fofoga Fetalai, manuia le

Taitai o le Malo ma le Kapeneta, manuia lau Afioga i lou uso le Taitai o le Itu Agai, le sui taitai ma le mamalu o sui usufono o le la itu, manuia le Fono a Samoa, soifua.

FOFOGA FETALAI: Malo.

Afioga Hon Palusalua Faapo II: Lau Afioga i le Fofoga Fetalai ma lou faaaloalo lava. Ou te faamalulu atu i lau Afioga i le Minisita, e faamalulu atu pe afai ua laavale sau faamatalaga, leai e le o se tetee i lau saunoaga, a o le agaga maualuga, ia tatou maua le vafealoaloai, aua e matou te faamamalu atu, o lau Afioga o le Minisita, e le na o se Minisita o le itu lena, matou te faaaloalo atu. Ae a oo loa i tulaga faapea lau Afioga i le Fofoga Fetalai, ia e le mafai ona ou nofonofu, e le mafai ona ou nofonofu i le puipuiga. O le mea lea, ia faamalulu atu i lau Afioga pe afai ua laavale se faamatalaga. Ma lou faaaloalo lava.

FOFOGA FETALAI: Ia o lea foi ua e toe faatoese faatoa lua aso. Se i silasila la i ai i le mea lea e taumafai atu ai nei le Fofoga Fetalai. Ua uma ona avatu lau tuualalo i le taimi ua sola ma le futia ua alu, fai fai malu le faiva, Saumani i ina, Saumani lea itu, Saumani Afaese le Fofoga Fetalai. O le upu a Saumani Afaese, taialalo le ia, taialalo le ia a Sa Saumani. Ua fiu le Aiga Sa Saumani e taumafai, leaga e manao lava le Aiga Sa Saumani e faalogo mai lava Samoa o lea lea lea, e le i ae, le i ae le faiva. O le a le mea na mafua ai ona maua Ao ma Iu o Malo? Taialalo le ia a Sa Saumani. O lea e alaala mai Tapuai ma Afualo, o la e nonofo ma paia ma mamalu o tala na a le atunuu, o le fautuaga lena a le Fofoga Fetalai lea e avatu, taialalo le ia a Sa Saumani ona tatou maua lea o Ao ma Iu o Malo. Ua uma ona ou fai atu, silasila mai i luga o lau kesi, o faiga faavae ma Faavae o le Malo ma Tulafono Tumau, ua uma ona fau. Fau i fea? Fau aua taimi e lugaluta ai le tofa i finauga a tagata. A o lea lava ou te piiama, o le avafatafata ma le tatou faatamalii e tau ai mea uma, aua e le aumaia mea na e fai ai tatou. Silasila ane, silasila ifo, silasila i luga, silasila i lalo. O fea? O Ulu o Gafa ma Iu o Gafa Matavai ma Mulivai fetaii, silasila i le saunoaga a le Minisita, uso tuofe e fananau i le afuafu e tasi. O le ala lena o lou taumafai atu. Aua le ave le naunau, ia e toe se'i le fao ua pu, o la ua faafofoga Samoa ua lau le faavalevalea o leisi e leisi. Malilie le tatou Fonousu, tatou faifaimalie, se sii i le sii a le tamalii ma le sii a le Vaatele, e le soona sii. A uma lava le taimi ua avatu la outou avanoa, ona outou saunoa lea, o la e tapuai Samoa ma faafofoga le atunuu. O le ala lea o le taumafai atu. Afai foi o se faiga ma...o lea ua tatou vaavaai i le aso lena ua tulai le Minisita mo Aoga, Taaloga ma Aganuu, sala ina tulai, na tatou amata i le aso muamua o faulalai tamaiti i i, fea? O le a le upu lea e laulalagi nei? A uma mai tamaiti i uta ona omai lea i fea? O moomooga ma mea o lea ua lagona i lou loto le tulai mai o le Afioga i le Minisita mo Aoga, Taaloga ma Aganuu. O le moni lena o le alofa i a tatou alo ma fanau. O fea e o i ai tamaiti nei ma tamaiti ia e sikolasipi mai, e toe tutuli e o i fea? Le paia e, ma le mamalu o le tatou Maota, lauamatootoo, onosai lo outou finagalo, e le faigofie le mataupu lea tatou te fale ai, ae o le avafatafata ma le faatamalii ma le faaaloalo, lea ou te augani atu ai, tatou tausisia lena.

Tulai mai le tofi mo le Alataua Sisifo.

Afioga LAFATELE PATRICK LEIATAUALES (Alataua Sisifo):

Lau Afioga i le Fofoga Fetalai, ou te tulai atu ma le agaga faaaloalo i lenei foi vaega o le afiafi e taumafai atu ia se manatu o lenei itumalo e tusa ma le Tulafono e pei ona taoto i lenei Maota.

Lau Afioga i le Fofoga Fetalai, ua matou faalogologo lava ma le totoa ma matau foi ia agiga o felafolafoaiga e tusa ma le Tulafono lenei. O le talitonuga o lenei usugafono, e tele lava ni itu sa fia agai i ai sa matou faamatalaga, ae ua i ai le taofi i le taeao lenei e tasi lava sina vaega lea o le a taumafai atu i sa matou faamatalaga, ona o se vaega e taua tele.

Lau Afioga i le Fofoga Fetalai, o le sui usufono lenei, a i ai lava tulaga e lelei ma talafeagai, ia ona matou lagolagoina lea. I lau matau atu i le Tulafono lea o investors po o latou foi o tagata na aumai e faafaigaluega a latou tupe i le atunuu lenei, o se vaega e taua i lenei itumalo. Silasila foi lau Afioga i le Fofoga Fetalai, o le atunuu lenei, o le atunuu tofi, o Samoa ma lona faasinomaga, ua iloa o tatou faasinomaga. A silasila foi i o tatou fanua tau Samoa, o lea lava e maopopo le Tulafono o le atunuu lenei, e le mafai lava ona faatauina se fanua tau Samoa, ae mafai la ona lisi.

Lau Afioga i le Fofoga Fetalai ma le mamalu o le Maota lenei, na ou ulufale mai i le 2006 o le talosaga lenei a lou itumalo, Lafai, silasila oe i Aiga ma le Faletolu, e miliona eleele o le itumalo lenei o lenei e avanoa, afai e i ai ni tulaga faapea e ono maua ai se manuia o le itumalo, o le a le mea e tuu ai? Ia lau Afioga i le Fofoga Fetalai, ne i te i ua sese sa matou faamatalaga i lenei vaega o le aso. E leai lava ma se mea o faia a lou itumalo, a o lena e tala lau lisi pe \$400,000, pe \$300 ma ona tupu afe ne i te i ua sese sa matou tala. Silasila la i manuia ia? O le agaga lenei o le matou taumafai atu, o le agaga lenei o le taumafai atu o le itumalo lenei e lagolagoina le vaega lenei. O le matou tala i le Maota lenei, se e leai lava ni investors e omai fao o tatou fanua. O le a le mea o le a fao ai fua? Feoti atu lea augatupulaga, leaga e maopopo pulega mamalu a alii ma faipule. Masalo o lau tau matau i le saunoaga a nisi o sui usufono, ia pe tau faatusatusa ia Tutuila, e ese lava Tutuila ese tatou. O pulega mamalu a alii ma faipule a mavae atu isi, e le mafai lava ona faoa e tagata nei o tatou eleele.

Lau Afioga i le Fofoga Fetalai o le matou tatalo i le Sui Palemia, aumai uma investors ia i le Alataua Sisifo, se i taumafai ni atinae ia maua ni galuega ma le soifua manuia o lenei itumalo. Lau Afioga i le Fofoga Fetalai, o lea ua i ai le faamoemoe ua leva ona taoto, e pasia loa le Tulafono Tau Faaofi aumai loa le matou talosaga i le Afioga i le Sui Palemia, avatu investors nei se i o matou faaaogaina ma lisi i le lima tausaga o matou eleele, e tele o matou eleele la e avanoa. Lisi le lima tausaga talau mai fale talau mai masini, lau mai mea. A uma lena lima tausaga o outou ae ua maua mea a le nuu. Silasila la lau Afioga i le Fofoga Fetalai i le taua o lenei vaega?

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea la ua ou maua atu le agaga o le sui usufono. A omai se kamupani tele lava mo le lima tausaga e lisi, e fia le tau o le lisi? Ia, o le a tutuli uma atu lava i ina. O le mea lea e taua, o le mea o le lisi, na ona uma lava o le piriota tapena latou toe o, ae o mea uma e taofi uma lava mo le nuu. Ia se i vaai la i le manaia? O le mea lea ou te fiafia

tele ai i sui usufono foi nei e saunoa ae malamalama. Ia ai o le mea lena sa tofi ai oe i o i le Central Bank a? O lea ua e malamalama ai i mea ia.

FOFOGA FETALAI: Malie lava Lafaitete se i avatu le fesoasoani a lou uso a faipule mo Faleata Sisifo.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, o le lauga a le sui usufono mamalu, e le tetee i ai le Itu lenei, o lea e lauga i le mea e tau o le investment, tupe mai fafo. E matua lagolago lelei e o matou sui usufono le mea lea, a aumai ave uma i o. A o le mea lea e lauga atu ai matou o lea e misi i le sui usufono, o le mea foi lea e tau o le sitiseni. O le mea lea le sui usufono, a o le investment ia e le tetee i ai le Itu lenei.

FOFOGA FETALAI: O lea ua maua. Ia malie le Alataua.

Susuga Papalii Lio Faavaivaiomanu Taeu Masipau: Lau Afioga i le Fofoga Fetalai, mo le faasaoina o le taimi o le sui usufono, ne i taitaiseseina foi le faafofoga mai a le atunuu, aemaise foi o itumalo, leaga o le Tulafono Tau Faaofi lea o fanua o le Malo e le o ni fanua faaleaganuu lea e agai i ai le Tulafono Tau Faaofi lea. Ma le faaaloalo lava.

FOFOGA FETALAI: Malo. Ia, ma fanua ua tofiaina. O le faaopoopoga lena o fanua o le Malo ma fanua ua tofiaina.

Tulai mai Lafaitete. Malie lava lau Afioga Lafaitete se i tuu atu le avanoa ia Gatoloai.

Afioga Hon Gatoloaifaana Amataga Alesana Gidlow (Faasaleleaga Nu.1): Faafetai lava i lau Afioga i le Fofoga Fetalai. E leai ua ou tulai atu e le o se faauilavea tele, a o sina mea e faamalamalama atili i le Afioga i le sui usufono mamalu, ona o lea sa taua i lana saunoaga se mea sa ou taua i lau lauga ananafi, i le tulaga lea i faipisinisi o lo o i ai Tutuila. Ou te le i faapea atu o le a omai Tutuila e ave o tatou fanua, e leai. O se faapupulaga o mea o tutupu i atunuu i fafo, e ono tutupu i totonu o le tatou atunuu. O ni tuualalo lava ma ni fesoasoani ae ua avese e le sui usufono mamalu le agaga na avatu ai le faauigaga ananafi. Faafetai.

FOFOGA FETALAI: Ia, tulai mai le sui usufono mamalu. Faatoatoa mai lau saunoaga o lea e manaia lava lau sau ae...

Afioga LAFAITETE PATRICK LEIATAUALES: Lau Afioga i le Fofoga Fetalai, e pei ona ou fai atu i taimi ua sola ma fatia ua alu, o Samoa o le atunuu tofi, ua iloa aiga ua iloa faleupolu o tofiga. Ma i lau faaliliuga lea pe afai e sao se matou tala, e le mafai lava ona i ai ni investors e sili atu a latou pulega i le pulega mamalu a alii ma faipule, a o le matou tala i lenei foi vaega, o le tau faapupulaga lena o matou manatu matou te lagolagoina ai le Tulafono Tau Faaofi lenei. Afai e to manu ma pasia foi, o vaega lelei ia. Ae a i ai foi ni vaega e le lelei i le matou vaai, e avatu lava le tuualalo a lenei itumalo. Ae pei ua faapena atu se matou tala, o lea foi pei ona saunoa le uso a Minisita ia Magele, leaga le mea e manaia o le lava o galuega e mafai ai ona faatino manaoga o tatou nei i Savaii. O lena e te malamalama lau Afioga i le

Fofoga Fetalai, e lelei le agai mai, o mea uma lava lea e taoto i Tumua, o falegaosimea, ua e silasila i le tatou malae vaalele i o, o Asau, o le tele o mea ia na o le pau lapi lava le mea la e i Savaii.

Ia, lau Afioga i le Fofoga Fetalai, e faapena le aotelega o sa matou tala, matou te tilotilo i le manuia o itumalo, aemaise lenei nuu o Alataua Sisifo. O la e faalogologo mai lou nuu, na valaau mai nei foi i le taeao fai mai, “Lafai, fai atu ia i le Fofoga Fetalai ma le maualuga o le Maota lenei, e miliona eleele la e avanoa, so o se taimi tou te mananao e avatu se lisi, se avatu se i matou sapi ai.” E pei o le mea lena e koleti e lau Afioga ma lou nuu. Ia o lea lava ou te le i vaai au i se atinae, a o lea e maua tala pe \$300+. Vaai i ai i le manaia o lea alamanuia? Faasalafa i matai e ola ai le matai ia ma fai ai mea e manao ai. E pei o le aotelega lena lau Afioga i le Fofoga Fetalai o so matou taofi, o le a le mea e tuu ai le aumai? Se lau mai a miliona aumai, ona lau atu lea i Savaii i le nuu lea ou te fai atu ai. O le a le safea le maaveave le fua i le maualuga o le usoga a Salafai, ae pei o le matou tala lena e faatino atu ai so matou lagona ma se leo o lenei itumalo e lagolagoina ai le vaega lea, ona o le manatu o le soifua manuia o lenei afioaga, maua ai galuega, fai ai mea faalelotu ma mea faalenuu i aso uma aso uma, aua e le faigofie le olaga i Savaii. O lea e malamalama lelei i tatou na feola mai i nuu ma Savaii. E faimea lava le taeao faimea le afiafi, o le lotu, o le faamati, e le faigofie. A o le a tuu tuu la eleele e pala ai lava, tatou te o lava i le lagi o taoto ai lava faapela?

Ia, o se matou tala lena ma le agaga faaaloalo. Lau Afioga i le Fofoga Fetalai faapea foi le paia maualuga o le Maota o le atunuu, a i ai foi se faaletonu o lenei usugafono, e faapena lava manatu o Lafai, o Lafai foi e le tae otaota, e tuusao atu lava faamatalaga pe a manao i le Malo i se mea. Ia manuia le Fono.

FOFOGA FETALAI: Malo. O le a avatu leaga o lea sa e taua ua lavelavea atu ai ma au le Fofoga Fetalai i lau lauga. O le a ou avatua uma le auiliiliga o le mataupu lea pe a fai foi lau tala e uiga i le tatou Tulafono Tau Faaofi, ae sao oe ua ono nei tausaga o tala le lisi a lenei nuu ae o lo o i ai nai mea o lo o poloka ai. Ia o tulaga ia tau invest. E tau fefefe investors e omai i inei, ona e leai se guarantee o le latou tupe o aumai. A o si o matou nuu, e maua lava le \$300,000+ i le tausaga. Ae o le a ou avatua leaga o lea ua e saunoa i le tulaga lea Lafaitale, e tataua ona malamalama le Maota. E muliaina mai nei le faiga investment lea, ae ua leva lava ona ou faia investment o le faa-matai o tagata, o lena lava tou te silafia. Ona alu alu lea e sili atu le malosi o lena i lo le passport, aua ua lotu Samoa finagalo Samoa, toe lava o le faa-Samoa e aoao i ai. Ia, ae o le a avatu le atoaga pe a oo mai i le taimi o le Fofoga Fetalai.

Tulai mai Aveautau, le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai, faafetai foi i le Afioga i le Palemia aemaise foi o le Sui Palemia i le faamalamalamaina o lenei Tulafono Tau Faaofi. Ou te faafetai foi i le Afioga i le Minisita mo Aoga, Taaloga ma Aganuu, e sao lelei le Afioga i le Minisita. E sao foi le Afioga i le Minisita Lagolago na lauga nei i le manaomia o mea faapenei, ae e le o le auala lea e faatino ai, lea o le a ou lauga atu ai. Ina ua manao Niu Sila e pulea Samoa, na alu le solotetee a Samoa, faatu ai le mau lea na faatu i Vaimoso. Aisea? E le

manao Samoa e sitiseni Niu Sila, e manao lava e sitiseni Samoa, e le i manao foi Samoa e sau se atunuu e tau le taua lea e tutoatasi ai.

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e le i manao Niu Sila e pulea Samoa. O le sao lena o le mea, ae na tofia Niu Sila e le league of Nation, Malo Afaatasi mulimuli ane ona avea lea ma United Nation. O i latou na na latou tofia Niu Sila e aumai e vaai Samoa ae le i manao i ai Samoa, e le i manao i ai Niu Sila. A o le faaiuga lena a league of Nation na fai, lea na ala ai ona omai Niu Sila ona o le taua lea na fai i le taua muamua lea na osofaia ai Malo nei ma tupu ai le mea lea na tupu. O lona uiga la, ana tofia lava e league of Nation Ausetalia po o Peretania e omai e vaai Samoa, ia o le tulaga lena, ae le faapea na omai Niu Sila e manao e pulea tatou, na faatonu e omai e vaai tatou.

FOFOGA FETALAI: Tulai mai le sui usufono e faaauau le saunoaga, lau Tofa Aveautau.

Tofa AVEAU TUALA LEPALE NIKO PALAMO: I lalo la o le feagaiga lea, e sitiseni Niu Sila uma ai tagata Samoa, i lalo o le feagaiga lea e saunoa i ai le Palemia. O le faamautuina o lou manatu lenei, o le faamasinoga lea na fai lea na aumai ai le iuga o le faamasinoga, o tagata Samoa uma lava na fananau i tua atu o le 1962 ua sitiseni Samoa, lea na ala ai ona fai le mau, e le manao ai Samoa e ave fua lona sitiseni. Na o le lua lava mea na ola mai ma le tagata, na ola mai o lou blood life, o lou gafa, o lou siosiomaga, ma le lona lua, o lou atunuu. O mea lava ia e lua e mitamita ai le tagata i so o se atunuu e ola mai ai, o mea lava ia e lua e te alu ma oe. Aisea? O lou aiga, o ai lava e tau i ai lou toto, o ou fanua ma lou atunuu.

FOFOGA FETALAI: Malie le sui usufono se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga o le mea e fia faasao, o le Tulafono lena na sao atu ai isi Samoa i fafo ma avea ai ma sitiseni Niu Sila, a o le tele e le i iloa. A na vave iloa le mea lena, semeamanu ua leva ona faaaoga e isi tagata. O le mea la ua tupu, e toatasi le tamaitai na ia iloa le tulaga lena, lea la na fai ai le faaiuga faamalosia a le Immigration New Zealand e foi mai ae na musu e foi mai. O lea la na finauina ai le mataupu lenei i le faamasinoga mauualalo, ae faaaoga la le Tulafono lea na pasia i le 1927, e mafai ai ona avea tagata Samoa ma sitiseni Niu Sila, o tagata e fananau i le va lena e tau mai i le 1949. Ona ave ai lea o le mataupu ua musu le tamaitai e aumai, ua manao le Immigration e tipoti mai. Ona sau lea o le iuga mai le faamasinoga mauualalo ua manumalo le Immigration, ona ave lea i le Supreme Court malo le Immigration, ave i le Court of Appeal i Niu Sila malo le Immigration. O lea la na ave ai e le tamaitai lenei i le Privy Council, o le faamasinoga faaiu lea a Niu Sila. Na ou maua faapea na o le valu lava minute na deliberate ai Faamasino i Peretania ae taunuu loa i le iuga lena. O i ina la na faatoa iloa

uma ai e tagata Niu Sila ma tagata Samoa e i ai se Tulafono Tau Faaofi faapea. E toatele la o tatou tagata na maua ai e Niu Sila i le taimi lena, lea na faaliliu ai loa fai ai ma le protocol lea na fai nei, e tai 1,100 tagata tatou e o i Niu Sila.

Ua ala ona ou faamatalaina atu le mea lea, ona na amata mai lava le mataupu a le sui usufono e le sao atoatoa. O le mafuaaga na ala ai ona luga le mataupu lena, ona o le tamaitai o le alo o Lesa, ua manao e tauave lona sitiseni Niu Sila. Ana leai la le manao i le sitiseni Niu Sila, e leai se faamasinoga e faia. E pei o le tulaga lena o lea ua ou faamatala atu le sao.

FOFOGA FETALAI: Tulai mai le sui usufono mamalu e faaauau le saunoaga.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, o le autu lava o lou manatu, a na tatou alu ai i le mea lea, e pei lava tatou o Niue ma Cook Island, tatou te sitiseni Niu Sila uma lava. A na le avea foi la e lea foi alo o le atunuu, o lea na faataga mai ai loa e sitiseni. Fai mai taitai o le atunuu i lena taimi, “E leai, e le fia sitiseni tagata Samoa.” Lea na ala ai ona fai le amnesty lea na saina i le 1982, lea na saina i Niu Sila, afai e saina le mea lea o e i Niu Sila, e te sitiseni Niu Sila.

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea e fia faasao. O le faalavelave lea o le a nofonono le palagi ae nanu Tulai. O le Tulafono lena, na maua loa le iuga lena, alalaga loa Niu Sila, “Auoi ta fia ola e, o le a tupu le mea o le a o atu uma Samoa i o.” E faamalosi la le faiga o le mea lea e le Palemene o Niu Sila, faamalosi ai le... na pau lava lea o se mea ua tutu faatasi uma ai lava Pati a Niu Sila ina ia vave ona pasi le Tulafono lea ae soloia le iuga lena, aua foi ua tetei latou, ana leai lava mea nei o loia ma le soliga o le Tulafono lea e le manu ae le Tulafono lea ua leva ona tanu i lalo. O lea la na faamalosi ai loa le Tulafono a Niu Sila pasi, ae feiloai mai i le tatou Palemia, faamalosi atu ai lea ma le tatou Palemia e saina faamalosi le protocol, lea la e alu ai lava ma tatou i le 1,100. A o le mea moni ana faapea e le soloia le mea lena, o le mea faigata lena e tupu, e fiu atu lava tatou e taofiofi ae le uma lava le fia o o tagata. E sese la le mea lea e faapea na manao tatou e teena, e leai. Na faamalosi mai e le Malo o Niu Sila le tulaga lena, o mataupu na sa fai ai foi se vevesi o le Vaega lena Faaupufai. E malamalama tele la i ai le Vaega lena ae le malamalama i ai oe i le tulaga o le tatou mataupu. Ae sili ona e see ese ia ma lena mea.

FOFOGA FETALAI: Ia, tulai maia le sui usufono.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, o le mea foi lena na ala ai ona ou avatua ona ou te malamalama i ai. E ala ona ou avatua, o le taua o le upu lena o le sitiseni o le atunuu. O le mea lena na ala ai ona o tagata Samoa fai le mau e tetee ai le mea lea, e le i fia sitiseni Niu Sila, e taofi ai le mea lea. O le mea lea na ala ai ona fai le mau.

FOFOGA FETALAI: Ou te manatu ua malamalama lea mataupu.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e eseese foi le mea na faavae ai le mau, e eseese mamao lava le mea na faavae ai le mau. A e faitau i le tusi lena e tau o le Mau, sa fai le mea o le Komisi Suesue. O le manaia ia o le tusi lena i le Mau, o le manaia ia o le tusi lena e sau ai i ina, na valaau taitasi mai ai sui taitasi, ona o atu lava lea e eseese latou ma latou mau na avatu. O lea ou te fai atu i mea faamaumau, ae le o ni mea tuufofoga.

FOFOGA FETALAI: Ou te manatu ua malamalama lea tulaga. Aveautau, agai mai e faamanino le fautuaga i le tatou Tulafono Tau Faaofi.

Tulai mai le sui usufono mamalu.

Tofa AVEAU TUALA LEPALE NIKO PALAMO: Ia o le a see ese ma le vaega lea. Faafetai i lau Afioga i le Fofoga Fetalai. I le amata mai o le Tulafono Tau Faaofi lena, sa ou vaavaai lava i le Minisita e ona le Tulafono Tau Faaofi ona o le tasi lena Minisita sa ou vaai maualuga lava i ai o se Minisita e ono taitaia le Malo i ni aso o i luma. A o le tulai mai o le Tulafono Tau Faaofi lena, e matua le agavaa lava e taitai se Malo.

FOFOGA FETALAI: Malie le sui usufono se i tuu atu le avanoa i le Sui Palemia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, o le mea tonu lava lea sa saunoa i ai le Taitai o le Itu Agai, se aua le agai i le tagata. Ma afai e te fia taitai oe i le tou Itu ona e taumafai lea e te oo i ai, ae aua le faia mai fua ma faatonu mai fua le matou Itu o lea lava matou te iloa e matou ia le matou Vaega.

FOFOGA FETALAI: Malo.

Tofa TUALA LEPALE NIKO PALAMO: Ia, e faamalulu atu i lau Afioga, lea o lau lava vaai faale-faipule. (.....). O le Tulafono Tau Faaofi lena, o le vaega muamua lava o le Tulafono Tau Faaofi....

Tofa Hon Fonotoe Nuafesili Pierre Laufo: Lau Afioga i le Fofoga Fetalai, o le mea e fia faasao.

FOFOGA FETALAI: Malie le sui usufono e tapa foi ona o le tamaliiaga o e na taua. Se i tulai mai lau Afioga i le Sui Palemia.

Tofa Hon Fonotoe Nuafesili Pierre Laufo: O le tulaga tonu lena lau Afioga i le Fofoga Fetalai, aua le tuuaia fua Ofisa Sili o Pulega e le o saofafai i totonu i nei e faaali atu ni o latou finagalo e tusa ai ma ia mea, ma e matuia foi ia lafoga faapea. E talosaga atu e faamaui ese.

FOFOGA FETALAI: O le agaga foi lena, e tapa le sui usufono mamalu, ia tatou fai fuafua foi i a tatou Tulafono Tumau ona o lea lava tatou te.... e le

afaina lava tatou o lo o tatou auai i le Maota e aumai avatu, ae e faamolemole atu ma faatoese atu ina ia faaui i tua.

Ou te tapa le tulaga lea ina ia aveese ma Faamaumauga, o le tauleagaina o e ua tofia. E ui lava ina le faaleoa o latou suafa, ae leaga o lea ua agiga i luma o le Maota ua i ai le Komiti Faapitoa o le a tofia. Tulai mai le sui usufono mamalu.

[Upu na faatonu e le Fofoga Fetalai e aveese mai faamaumauga o le saunoaga a le sui usufono mo Faleata Sasae: “E oo foi i lauia ia na e saunoa i ai, e lagona lava lou faanoanoa i lauia ia, o ni tagata e vaai atu e le o ni tagata e alolofa moni ia Samoa.”]

Tofa AVEAU TUALA LEPALE NIKO PALAMO: Lau Afioga i le Fofoga Fetalai, leai ou te le i faaleagaina le Komiti, na pau lava lau tala lea na fai o le le alolofa, e le o se faaleaga le mea lena.

A tagai i le Tulafono Tau Faaofi lenei, e leai leai se mea i totonu o le Tulafono Tau Faaofi lenei o faapea mai ai e sue ni galuega a tagata Samoa. E leai ma se mea o i totonu o le Tulafono Tau Faaofi lenei. Sa tatau foi afai o le autu o le Tulafono Tau Faaofi lenei o le sue o ni galuega, sa tatau la ona tuu ai i totonu i i, ia sau le kamupani ia faigaluega ai tagata Samoa.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea o le a tauau ina aliali le vaivai tele o le sui usufono. E le faapea e aumaia tupe ona aumai lava lea o tupe taatitia. E leai se mea faapena e tupu, e faagaoioi e tagata. A fai sau pisinisi pei o le faleoloa, e le tutu mai lava oloa latou e o atu lava tagata o latou ave, e faagaoioi e tagata, ioe. Ma e leai lava se investment i le lalolagi lenei e te i lava ua felelei mai tupe i o omai faagaoioi fale faatutu. E le faatutua e ni aitu ni fale, e faatutu e tagata, ma e faigaluega tagata. Lua, o tagata atamamai. E pei e lelei ona fai fuafua a tatou tala, leaga e matauina ai oe. A ia matau lelei, o la e faafogafoga mai lou itumalo, e le mafai ona tuuloa le lauga e alu loa. Afai lava matou te faalogologo atu e faaletonu le lauga, matou te tutu atu, o le mea la e tupu, e leai ni ou ai faaopopo e maua, na o ai toese. O le mea la lea, tuutuu loloto le tofa.

FOFOGA FETALAI: Tulai mai le sui usufono mamalu e faaauau le saunoaga. Aua e te faalogo tele ia Levaopolo lena e musumususu atu ua uma ona lauga ia a o lena e manaia lau agiagi.

Tofa AVEAU TUALA LEPALE NIKO PALAMO: Faafetai. A outou tagai i le Tulafono Tau Faaofi, o lea e fai mai le Tulafono Tau Faaofi, a sau le tagata e invest i le \$4miliona ma aumai lona aiga ma aumai lana fanau, ma aumai ma ni tagata e tau i ai i lalo o le Tulafono e mafai ona sitiseni, o tagata la ia e omai e fai le pisinisi lea. O le a le mea ua le tuu ai i totonu o le Tulafono Tau Faaofi a e sau ma lau \$4miliona, e fia sefulu tagata e aumai i Samoa....

Tofa Hon Fonotoe Nuafesili Pierre Lauofo: Lau Afioga i le Fofoga Fetalai o le mea e fia faasao.

FOFOGA FETALAI: Ia, se i tulai atu le Minisita e ana le Tulafono Tau Faaofi.

Tofa Hon Fonotoe Nuafesili Pierre Lauofo: Ua uma ona saunoa atu le Afioga i le Palemia, ae atili ai ona aliali le vaivai o le sui usufono lea i lana talanoa mai. Silasila ifo i le Tulafono Tau Faaofi, ma faitau lelei i le Tulafono Tau Faaofi. O mea na e te sau ai, o mea e fai i lalo o Tulafono Faatonutonu e fai i lalo o faiga faavae. O lena e i totonu o le Tulafono Tau Faaofi, faitau lelei i ai.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, i le saunoaga a le Sui Palemia i le amataga o le Tulafono Tau Faaofi lenei, e tolu vaega na e saunoa i ai i le Tulafono Tau Faaofi. O le vaega muamua, o le faatosina mai o tagata, investors. O le vaega lona lua, sue galuega. O fea la o le Tulafono Tau Faaofi lea o i ai se sue galuega?

Tofa Hon Fonotoe Nuafesili Pierre Lauofo: O mea na e te agai mai ai, e le tau tuua i totonu o le Tulafono Autu le Principal Act, o mea na e tuu i totonu o Tulafono Faatonutonu, Regulations ma Policies. Se o mea na o lea e taumafai atu e faamalamalama ae te le o malamalama. Faitau lelei i le Tulafono Tau Faaofi.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, o lea ou te talanoa atu i au saunoaga, lea ou te talanoa atu i au saunoaga, o lea foi ua saunoa le Afioga i le Minisita, e moomia ni a tatou galuega, e le o i ai i totonu i i. O lea ua taua faafa faalima le Yazaki i le vaega lenei. O le Yazaki, na ala ona sau le Yazaki i inei, ona o le labour cost a tatou, o le tatou minimum wage sa i ai i le vaitaimi lena. E le i sau i lalo o se mea faapea. Na sau foi le Yazaki ma latou oloa ia e aumai, e le faataua i Samoa, e ave i fafo, e ese le case o le Yazaki, ese le Tulafono Tau Faaofi lenei. O le Tulafono Tau Faaofi lenei, a e sau ma lau tupe e \$4miliona, e fai. O le a le mea e le fai ai e le Malo se \$10miliona e ave e invest atu i tagata faipisinisi?

FOFOGA FETALAI: Malie le sui usufono se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lo o open ended le Tulafono Tau Faaofi, e aofia uma ai lava le vaega lena lea e te taua. O le mea lea ou te tulai atu ai, o le Tulafono Tau Faaofi lea sa saunoa atu ai le Sui Palemia, ona e tele lava ina nunumi le mataupu lea i totonu o le Maota nei. O lea lava e le galo ia te au isi saunoaga po o le a le mea e le aumaia ai Tulafono Faatonutonu i totonu o le Maota lenei, ona ou tu ae lea faamalamalama, a outou silasila i Tulafono uma lava, o lena e tau mai ai, a oo i tulaga o mataupu e aafia ai Tulafono Faatonutonu, ona faatino loa lea i Tulafono na, o Tulafono na faatonutonu e faatino i le tulaga o le malosi o le Kapeneta ma le Ao o le Malo e saina ai.

O le ala lena e malamalama uma ai e sa Minisita i le itu lena, e oo loa ina faagaioi le tele o tatou Tulafono, e i ai vaega, e le tau aumaia i totonu o le Palemene, ona o mea e faatino ai gaioiga, e faatino ai aiaiga tetele, o lea ua uma ona pasia atu i le Tulafono Autu. Ona faagaioi loa lea o le Tulafono ma faagaioi loa ma Tulafono Faatonotonu. O lea la e tele ina le malamalama ai foi le tatou Maota nei, pei e fesili ai po o le a le mea na le aumaia ai i le Maota nei. O a Tulafono e aumai, a o a Tulafono e pasia i le malosi o le Kapeneta. O mea na ua uma ona delegate atu i ai e le Palemene le malosi lea. E pei la ona faamatalatala atu ona e vaai atu e le o malamalama le sui usufono i le eseese o mea ia e lua. E i ai vaega tetele, vaega autu e aumai i i, a oo loa ina faatino ma faagaioi le Tulafono ma le pisinisi o lea ua tulai mai, ona faaoga loa lea o le Tulafono Faatonotonu. Na o le Kapeneta lava la ma le Ao o le Malo e tusa ai ma aiaiga o le Tulafono, ina ia malamalama i ai, ona o lea ou te vaai atu e le o fia malamalama le sui usufono.

FOFOGA FETALAI: Ia, e manatu o le a le faia se finauga umi, e taua lou finagalo ma lau faamanatu ona o lea e maua e le Nofoa e te manao ina ia matua auiliili uma mea i le Tulafono Autu, a o lea foi ua faamalamalama mai e le Malo, ae ese lava le category e agai i ai le Tulafono Autu, ae i ai foi faiga faavae po o policies i totonu o Matagaluega e limataitaiina uma ai le atugaluga. Ae taua lou finagalo Aveautau, ae agai i se isi mataupu toe lima ou minute.

Tofa AVEAU TUALA LEPALE NIKO PALAMO: Faafetai. Na ala ona ou laga le vaega lea, ona ana faapea mai le Tulafono Tau Faaofi, o le faamoemoe o le Tulafono o le siitia o galuega a tagata, ua manaia. O le mea lena na ala ai ona ou laga le mataupu.

FOFOGA FETALAI: Ia o le ala lena, vaai foi i le mea lea na ou faamalamalamaina atu, o investors when it comes to invest, e pei ona outou silafia o investors mo le faalauteleina o le mataupu e aofia uma ai faamanuiaga eseese e oo lava i galuega, ae ou te iloaina o lena e malamalama i ai lau Afioga i le sui usufono. Tulai maia e faaauau le saunoaga.

Tofa AVEAU TUALA LEPALE NIKO PALAMO: Faafetai. O lau vaai i ai i le vaega lea, o le tele o tagata faipisinisi a tatou, e tele foi o latou potu ma le latou idea e fai ai le pisinisi, a o le faalavelave, e leai se tupe. E leai se mea e tua i ai i seleni, e fau ai le pisinisi lea. E tele mea ua maua e le SROS, e leai se isi e faia, leai se tupe. Aisea la le mea e le aumaia ai e le Malo se \$10miliona, \$20miliona pe \$30miliona e invest i tatou tagata faipisinisi?

FOFOGA FETALAI: Malie le sui usufono se i avatu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ina ua tatou tutoatasi, na o le tasi lava si tatou tamai bank sa i ai, le Bank o Western Samoa, e le tele ni tupe na i ai. Ona alu alu lea oo mai loa i le 1974, ona vavae loa lea o si tamai vaega o le Bank of Western Samoa ae amata mai loa i ina si tamai iunite lava, ona faaigoa loa lea o le Development Division. O le development la lena na

sau sau loa, liliu loa faatu le tatou Development Bank, le atinae la lea o le Faletupe o Atinae. Ona faasolo mai ai lea, oo mai loa i le tausaga e 1984, faatu loa lea o le tatou Faletupe Tutotonu.

Na ala ona faatu le tatou Faletupe Tutotonu, ona ua maitauina o le isi lea faapogai o le tamaoaiga, e tatau ona i ai se tatou Faletupe Tutotonu, e matua agai tasi lava i le faatonutonuina o tatou tupe o lo o faagaoioi i totonu o le atunuu, aemaise lava i tupe faaagaaga mo fefaatauaiga. O lea la na tolu ai loa tatou faletupe. Ona alu alu lea faatu le faletupe o le Westpac, alu alu i le 1989 ona fai loa lea o le iuga i ina o le a faatau ina ua faamatuu atu le tele o tatou aseta i le ANZ, o lea la ua le BWS a ua ANZ. E tele foi la isi mea lelei na fai e le ANZ. E fia la tatou bank lea ua i ai nei? O le ANZ, o lea ua i ai ma le tatou Westpac, o le Samoa Commercial Bank ma le National Bank, ua fa. O lea ua i ai ma le isi bank lea ua fuafua, ona lima ai lea. O lea foi e i ai ma le NPF o le isi bank aupito tele lea o le NPF e sulufai i ai le tele o isi e faatino a latou pisinisi. Ae le gata foi i lena, o lea foi ua faatu ma le UTOS. O lona uiga, o lea foi ua tele avanoa mo le aufaipisinisi. E oo foi la i le DBS, o lea foi la e auala mai ai i i isi a tatou grants tetele e aumai i le ADB, aumai le World Bank, aumai i le faletupe foi lea o le European Investment Bank, e aumai e faagaoioi ai le tatou tamaoaiga. O lona uiga, o lea ua tele le mea i totonu o tatou e o i ai a tatou tagata faipisinisi e faatino ai. Ne i te i ua e le iloa, ae o lea e aliali mai i i le tele o tatou faletupe ia e i ai nei, e sulufai i ai i latou e moomia ni atinae tetele faapenei. Ua ala ona umi lau faamatalaga, o lea ua ou toe faapea atu, e le lelei le mea lea o le toe tutu atu o matou faamatala atu ia te oe, ae a e toe sau i le isi faiga palota, fai lelei mai au lauga. O le taimi lenei, na o ai faaopoopo, ai faaopoopo, ai faaopoopo, a o le mea lena e te faia, na o ai toese lava. Aua ua faamatala uma atu lava e matou o la e faalogologo mai lou itumalo, o la e faalogologo mai i au saunoaga ia e fai ma le matou taumafai e faasao atu ma faasao mea ia, a o mea o lae malamalama uma i ai lou itumalo. O le faasao atu lea.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, ua matua malamalama lou itumalo i mea nei, e leai se mea tou te popole ai fua i lou itumalo, e tele tagata o lou itumalo e aafia ai i vaega lea leaga o le itumalo o au lea e i totonu o le taulaga, a oo le mea lea, o fea fanua e faatau e tagata nei pe afai e ave i ai le sitiseni? O fea? O fanua o le itumalo lenei, lea e fai atu ai le Tulafono Tau Faaofi lenei ina ia malamalama i ai le itumalo lenei. O lau talosaga, o lea ou te malamalama i le mea lea e te saunoa ai lau Afioga i le Palemia, aua o la e le o tu mai luga le... Ae o le \$30miliona lea ou te talanoa atu ai, o la e malamalama lelei lou itumalo.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o la e tele lava le uiga o saunoaga a le sui usufono, pei e foliga mai i lana saunoaga, e matua leai lava se mea e sulufai i ai tatou tagata mo fesoasoani ia. A o lea e aumai a tatou Lipoti ma tilotilo i ai i le tele o pisinisi ia e faatupe mai e faalapotopotoga nei, aemaise foi e le faitaulia ai ia fesoasoani i nonogatupe tuusao a le Samoa Commercial Bank, National Bank faapea foi ma le WESPAC, lea ua faatau nei e le isi faletupe mai Papua New Guinea, ia faapea foi ma le ANZ, o lea la e tele mau alatupe ia e maua ae le tuuina ai foi le tatou NPF lea e fesoasoani, ia vaai i le tele o nei Faalapotopotoga e fesoasoani i a tatou Private Sector. Ae

o le tulaga lea e i ai, e i ai lava le faaletonu, o le faaletonu lava, o le tele lava o faaletonu o le Financial Management, lea la e afaina ai, o le tele lava o taimi a o atu ia ona talatalanoa mai lea i le tulaga lena, ia ma le isi lava lea mea pei e fai sina tetele foi lele ae faalelelei le faagaioiga o latou polokalame.

FOFOGA FETALAI: Ia faaiu maia le saunoaga a le sui usufono mo Faleata Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, o le manatu autu ia o lou manatu, o polokalame ia o lo o fai foi i isi atunuu i fafo, invest atu o tagata, invest lava a le tagata, ave i ai ma se faamama avega e tasi pe afa pasene e ave i ai, ave i ai ma se grace period e faaoga ai le tupe lea ina ia...a alu lava le kamupani lea a tatou e faatau fanua, o fanua lava o la e faatau e tagata Samoa, a o le Tulafono lea ua tulaga mai i i, o se Tulafono e matua e le tatau ona faataatia....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e i ai foi la le mea o la e fai e fesoasoani ai i o tatou tagata o lea e i ai le Housing Corporation, a, e fesoasoani i tagata e moomia ia tulaga ia e lagolago atu i a latou talosaga o mea tau fanua ia ma fale. Pei e matua e le malamalama lava i le mea lena ua leva ona fai. O le tausaga e 1989, na aumai ai le Tulafono i totonu o le Maota lena e faatatau tonu lava i le mea na o le Housing Corporation. Pei e lelei ona ou faalateleina atu ia le Housing Corporation, o lena e i ai le Housing Corporation e faatino ai ia mea ia e te naunau i ai.

FOFOGA FETALAI: Tulai mai le sui usufono mamalu.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, e le oo se loan i se \$4miliona pe a alu se tagata faipisinisi i le Housing Corporation e aumai se fesoasoani. O lau fautuaga, pe mafai e le Malo ona faataatia se \$30miliona i le \$40miliona e o i ai tagata ia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e fua le tupe i lau atinae e fai, afai lava o lau atinae e fai o sou fale foi lea atinae puaa, se i tulou, a, e amata i le tolu, e te le moomia se \$40miliona. Ia se i vaai la i le tele o le faaletonu. E fua faatatau le seleni i le tele o lau poloketi o lo o fia fai. O tagata foi ia e faagaioia faletupe nei, e le o ni vale, o tagata e matua maai ia faiai i le faatinoina ma le tilotilo i lau mataupu o le a avatu, e seasea sao ai se kuluku, ua tatou iloa uma lava le toatele o i latou, e tele foi le au faapena lea e fai a latou pisinisi, ia e tele lava le faaletonu, aemaise o le ese o le mea na fai ai le pisinisi, ae ese le mea ua fai ai.

Lau Afioga i le Fofoga Fetalai, o mea uma lava ia e te saunoa mai ai, o mea o la ua i ai ia fuafuaga o la ua taoto ia faiga faavae a le tatou Malo e auala atu ai ia fesoasoani, e ese mamao lava le Tulafono lea tatou te talanoa i ai, o le tatou Tulafono lea e talanoa ai o atinae fou, atinae tetele, atinae pei o le Yazaki, o le ala lena o lea e faatulai atu pea le Yazaki – ma a tatou talanoa i le Yazaki, ona e manatua lea o le Kapeneta lena na aumaia le Yazaki, e le

faapea na te i lava ua sau le Yazaki, o lea ou te malamalama lelei i le auala mai o le Yazaki, na ona ou faapena atu. Ou te faaeteete tele i le upu foi lele, o le nanu o Tulai ae nofonofo le palagi. Ia o le a toe faamatala mai mea na matou faia, e malamalama tele i ai, e ese mamao lava mea na matou faia mea na e tau faamatala mai. O le mea lea, sau se isi mea, ae aua e te sau i le mea lena e te mafatia ai.

Tofa Lealailepule Rimoni Aiafi: Lau Afioga i le Fofoga Fetalai, o le mea e fia faamalamalama lau Afioga, na saunoa manino le Afioga i le Palemia o le Tulafono, o le Tulafono a le Sui Palemia, ae ua ou alofa isi a matou sui usufono, ua fai toalua e le Palemia ma le Sui Palemia le matou sui usufono.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ia e leai lava ma se aoga o le mea na tulai mai ai le sui usufono mo Faleata Sisifo ia.

FOFOGA FETALAI: Aua le tali i ai lau Afioga, e le faasaoa e le isi faauilavea le isi faauilavea.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O lea, leaga a tuu loa, a tuufau, a, o le a atili ai.

FOFOGA FETALAI: Ia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Ae pau lava le mea o le a ou tau atua ia Leala, Leala, so o se taimi lava e te tulai mai ai e te faaletonu, ou te tu atu lava ia oe.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, ua vevela foi le aso.

FOFOGA FETALAI: Ia faaii maia le saunoaga ua vevela le aso le sui usufono mo Faleata Sasae. O lea lava e ava atu ua maea lou taimi.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, o le autu tonu lava o lou manatu, tusa e matua leai lava se option a le Malo e sue ai galuega a tagata, faatau loa ma le sitiseni, o le autu lena o lou manatu.

FOFOGA FETALAI: Ia o lea ua maua le autu o lau vagana.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ia se i vaai la i ai i le sese o lenei ma le vaivai o lenei taofi e aumai, a. O lea e alu lava ia le faagaoioiga a le Malo, o lea e alu lava polokalame. A o le mea lea e manao i ai le Malo, aua ne i tuu ai i polokalame, vaai polokalame fou, o lea ou te faaaoga le upu fou, polokalame fou faaopopo, a, ina ia atili tele ai galuega e faatulai mai. O le a ou tau atua le mea lea ne i te i ua le malamalama. I le taimi nei, lea e faasalalau a tatou Tauofoga i le fausia o ia auala ma ia auala ma ia fale, a malo lea Tauofo, ia ua on le galuega, e fia 50, 100, 300 tagata faigaluega lea e

faigaluega ai. O le fale la e i tai lea e fau nei o le faletalimalo lea o le La Mana, lea foi e faatu i luga o faatosina ia a le Malo, e ova i le selau tagata faigaluega, e ova i le selau tagata faigaluega Samoa la e galulue ai, a o le polokalame lena e faatoa maea lelei ia le vaega muamua i le masina po o Fepuari po o Mati i le tausaga fou, a uma lena, ona sosoo lea ma le vaega lua o isi foi faletalimalo, ma le vaega tolu, e soosoo lava ia isi fale fou na ae ese ai ia fale ia i totonu o le motu, a uma la ia polokalame ia, a, o le a matua tulai mai ia le faletalimalo lena i se tulaga maoae, e aumai lava e latou o latou tagata e nonofo ai, e leai se mea e popole ai ia Gatoloai, e le afaina ai au tagata i lou faletalimalo, e aumai lava e latou a latou tagata e nonofo ai i totonu o latou faletalimalo, ae o le a matua manuia ai ia le itumalo o le tama lena o Lefau, aua foi o lea e tulata i le faletalimalo, o le a tele a latou galuega e maua ai, o le taimi nei e ova i le selau tagata e faafaigaluega ai i le fausia o fale nei, ae a uma loa mei mai le vaega lena ae o atu foi le isi silia i le selau tagata faigaluega e galulue ai i le saunia o taumafa ma vaega eseese. Ua outou vaai la i ai i le manuia o le itumalo lea o le a tafe mai i i i le faletalimalo lea, o polokalame la na faaauau, a, o polokalame faaauau na lea e alu lava, e le gata o la e manuia ia na faletalimalo ma na tagata faigaluega, a o lea e alu lava polokalame o le fausia o tatou Infrastructure Development mo Atinae Autu e tolu i ai isi atinae faapoopo, e le o faapea o taofia. O le mea la lea ou te fai atu ai, e soso ese ma le vaega pumoomoo lena tou te omai ai, o outou uma lava.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, o lea o le a ou fai atua se faataitaiga, atonu e aafia ai foi nai tagata faipisinisi o lea ua i Samoa, o le a ou fai atua le faataitaiga i le mea e ono oo i ai Samoa i le isi sefulu tausaga pe a talia le Tulafono lenei. A outou vaai i nisi tagata maumea o lo o i ai nei e mai Asia e tumu ai le taulaga, e fia ni fanua ua faatau e tutu ai faleoloa, ua outou vaai i Vaitele, e fia? A toe omai nei tagata i le isi sefulu tausaga lea, e toe i ai se Apia, e toe i ai se.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Malie le sui usufono, se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O Frankie lena e te fai mai ai? O Frankie, e nofo i le teine Samoa, e toatele lava le fanau a si tama, o lea na logo mai au, o le teine Vaimoso, o le aulelei ia, ou te nofo lava ma ou mafaufau foi lele, po o fea ea taulelea Vaimoso, o fea o i ai se i nofo ai, a o lea ua nofo i le Saina, a? Ia o la e iloa lava e le teine ia lona manuia, a? E ova foi i le toaselau tagata faigaluega na e galulue ai, a o le toalua o le Samoa ma si a la fanau, o le toatele ia o tagata Samoa la e faalagolago i ai, la e ola ai, e le gata ina galulue ai, a o le tele o tagata Faleata o lea ou te talanoa atu i tagata Faleata, o le toatele o tagata Faleata la e faatau mai ai i le pisinisi foi a le isi Faleata la e nofo i le alii mai fafo. O lona uiga e te manao e faasa, e faasa le mea lea o le nonofo o tatou tagata i tamaitai ma alii mai fafo, sole, se o mea faa Hitila alii au mea, aua e te lotoleaga, a? Afai ua leai sou auala i lena teine aulelei, ia ona

ua pau lava, afai ua sau lena tagata mai fafo nofo i lea teine aulelei, I'm sorry, ia vaai i le toatele o outou Vaimoso ae sau lava lenei toatasi mai fafo, o le aulelei o le teine lea ou te...ou te fai atu o taimi uma ou te vaai i ai, ou te mafaufau ia Palu.

Tofa AVEAU TUALA LEPALE NIKO PALAMO: Lau Afioga i le Fofoga Fetalai.....

FOFOGA FETALAI: Ua maea le taimi o le sui usufono, ua manino ma malamalama o lea ua tualuga lau saunoaga autu o lea ua ave lou manaoga, ia o lea ua tualuga i le paolo o le tatou itumalo le...silasila foi i le tatou taimi, ua leva ona maea lou taimi a o lea lava, ia tulai maia.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, na o sina avanoa se tasi lau Afioga i le Fofoga Fetalai, leai, e le tele se mea ou te fia, e aulelei mamao atu lava si ou toalua i le teine lea, ia a o le teine lea o le teine o le matou aiga, leai pei ona ou faamalulu atu, o se vaai lenei, e le afaina, aua e ala ona ou fai atu, o Frankie o le sitiseni ou te le o tau atua se...o le sitiseni Samoa, a o tagata nei, e ave loa i ai le sitiseni ona mafai loa lea ona ia faia le mea lea e...ia ma le faaaloalo lava lau Afioga i le Fofoga Fetalai, faafetai atu i lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e mama lava mea i e loto mama, ae palapala foi mea i e loto palapala. O le Tulafono lenei na fau i luga o le loto mama.

FOFOGA FETALAI: Ia malo faafetai, ua tualuga le saunoaga a le sui usufono mo Faleata Sasae, e manatu ua manino ma malamalama foi le faafofogaaga a le tatou Maota. Ona o lea ua tatou tulalata i le tatou taimi malolo, ua ou lagona ai, ua tataua ona vavae foe. Malo le tauatai, malo foi le onosai i lenei aso ma tualumaga o le tatou galuega, ia a manatu i le taeao analeila, e oo mai i lenei taimi, e fai sina tele o le tatou galuega ua uma ona laasia. A faafofoga foi ma mataua atu i tuleiga ma saunoaga, ia e matautia le aanoa o manatu ma lagona ua saunoa ai foi lea itu o le Maota ma lea itu o le Maota. Ua taumasuasua le ipu, aemaise foi le tulaga o le tamaoaiga o fautuaga, o timaiga, ia atoa ai foi ma fesuataga.

A o lenei aso, ou te talitonu o lea ua taatia i lagotonu le tatou galuega ma le faamoemoe, o le a tatou taupule i le aso a taeao, o taeao foi o le aso puupuu, ia e tatalo atu pea i le tatou Maota, o lea lava e faagasolo tualumaga o a tatou lauga i saunoaga faalauaitetele, ia atonu e tatou te aulia foi le Aso Faraile o le vaiaso fou, ae o le a tuu atu lava i ina i le paia ma le mamalu, aua o lea ua vaai atu ua matua sauni ia sui usufono mamalu uma e tulei saunoa i lenei Tulafono taua, ia o taimi o avanoa e le aumaua, ina ia faataatia i lagotonu le taua o lenei Tulafono, ae tatou maua pea le agaga o le fiafia, it's a great medicine of life is happy, aua ne i faamamafa e se isi se mea, i alu alu saa se vae o se isi, ia maua le agaga o le filemu ma le agaga o le fai mea fiafia ma tatou fai mea talie, aua le fai mea ita, ua vaai atu ua manaia le tatou Fono ua valalata, o le mea lea ua aapa atu lava le isi i le fusiua o le isi ma toso mai.

Ae tatou alo pea i a tatou galuega ia ma tatou talatalanoa e taua foi le famamafa, o le tulaga sili lena na faatau e le tatou Palemene, o le tulaga po o fea e agai i ai upu ma tala, e tatou te toe ifo lava le fuiniu i le lapalapa, o le tatou vafealoaloi ma le loto mauualalo. O a foi tulaga o tuleiga ma saunoaga o lenei aso, ia o lo o i ina le uta a le faimea, talatala faavaatiu lo outou finagalo, o lenei aso, ia aua ne i paia se fofoga i lou lava aao, tulaga o le faamoemoe ina ia taatia i lagotonu, aua foi upu ma tala na felauai i lenei aso, ia lafo i nuu le aina, tatou sele le lauava mumua na manaonao i ai Puleleiite ina ia manuia le atunuu, aemaise le faatulagaga o lenei Tulafono ina ia taatia i lagotonu.

Ae le i faia le tatou malologa i lenei afiafi, ou te valaau atu i lau Afioga i le sui usufono mo Sagaga le Falefa, ia tulai maia e fai le tatou tatalo faaii, lau susuga i le tatou sui o le tatou Fono Tatalo, tulai mai e fai le tatou tatalo faaii, ona tatou malolo ai lea.

Na tolopo Taulumaga a le Fono Aoao i le itula e 12:57 i le aoauli seia aulia le itula e 9:00 i le taeao o le Aso Faraile, 20 Fepuari 2015.